

أوسكار والسيدة الوردية

إريك إيمانويل شميت

ترجمة

محمد صالح

فبراير 2007
الدار للنشر والتوزيع

اسم العمل : أوسكار والسيدة الوردية

تأليف : إريك إيمانويل شميت

ترجمة : محمد صالح

تصميم الغلاف :

الطبعة الأولى : فبراير - 2007

الطباعة : مطبعة أتيليه تاتش - المحروسة

الناشر : الدار للنشر والتوزيع

تليفون - فاكس : 3531343 (202)

بريد إلكترونى : eddar_press@yahoo.com

www.geocities.com\eddar_press

المدير العام : محمد صلاح مراد

رقم الإيداع :

الترقيم الدولى :

مهداة إلى دانييل داريو

المقدمة

"تهت في صحراء الجزائر ذات مرة فاستلقيت على ظهري في ظلام الليل في انتظار الموت، فأتاني بدلاً منه الإيمان"

كانت تلك هي كلمات إريك إيمانويل شميت رداً على سؤال نجيب محفوظ عن سر النزعة الصوفية في رواياته، تماماً كما رأى أوسكار بطل رواية "أوسكار والسيدة الوردية" ربه يزوره حينما أتم التسعين عاماً.

جاءت كلمات إريك إيمانويل شميت صادقة معبرة عن لسان حاله هو شخصياً وهو يتعرف على المطلق ويعرفه للمرة الأولى دون وسطاء ودون جملة الطقوس المتعارف عليها في الديانات المختلفة، لقد "جاءه" الإيمان (و قد افتقدت تربيته أي جانب ديني لنشأته وسط أبوين ليبراليين غير مؤمنين) وملاً قلبه وجوارحه من كل مكان وبكل الأشكال وفي كل اللحظات، فأحس أنه جزء من هذا الكل ليخرج من تلك التجربة ويقص علينا تصويره عن العالم وعن الوجود من خلال شخصية شديدة الرقة "أوسكار" الذي يعلم ونعلم معه منذ بداية الرواية نهايتها، فلا يكمن جمال الرواية في حكتها أو في تشابك أحداثها وشخصها وإنما يكمن في جمال روح النص الذي يتهدى بخطوات رشيقة مرحة دون ابتذال ومنتزجة نحو عمق المضمون دون تعال أو تقلسف.

كانت تلك الطاقة النابعة من التناقض بين البساطة المفرطة في اللغة من ناحية وتعقيد وجدلية الموضوع محل المناقشة من ناحية أخرى هي الدافع الرئيسي لاستخدامي اللغة العامية، مع علمي أن ذلك سيولد جدلاً لا ينتهي حول شرعية استخدام العامية في الترجمة أو في الكتابة بصفة عامة، إلا أن تلك الصدمة التي تصيب القارئ وهو يقرأ على الورق ما يسمعه في حياته اليومية

هي بيت القصيد، وبعدها قمت بترجمة خطابين من باب التجربة تأكدت أن هذا تحديداً ما أراه في ذلك النص البديع الذي وقعت في حباله منذ كلماته الأولى، هكذا بدى لي النص وقد قرأته مترجماً للروسية عن الفرنسية (و أود هنا الإشادة بالترجمة اللامعة للسيدة /إيرينا ميخكوفا رئيسة جمعية نقاد المسرح بجمهورية روسيا الاتحادية)، شديد البساطة والسذاجة والعفوية، وما عسانا أن ننظر من طفل في العاشرة، لقد تجسد أوسكار أمامي وأنا أكتب خطباته بالعامية فأضحى من المستحيل أن أتصوره مختلفاً، وأما عن الاختلاف الشديد بين ما نكتب وما نتكلم فهي قضية أخرى محل جدل وتحليل، فقط رأيت أن النص شديد الحميمية والرقّة وأسفقت عليه من التفلسف والتحذلق والاستغراق في جمال اللغة بعيداً عن بساطة وعفوية تفكير الطفل.

كذلك فإن العامية تجعل لخطاب السيدة الوردية في نهاية الرواية وقعاً مهيباً يتفق وجلال الحدث، ويخلق ذلك التناقض بين العامية والفصحى حالة تكرر مأساوية قدر أوسكار، صدمة أخرى تماماً كالتي حدثت ونحن نقرأ الخطابات الأولى بالعامية، تتوازي مع صدمة الموت التي دائماً ما تفاجئنا حتى مع أننا نعلم تمام العلم، بالنهاية الحتمية لا لأوسكار وحده ولكن لكل حي على الأرض، وذلك تحديداً كان مسار مناقشات أوسكار مع السيدة الوردية.

لذلك أستمحك عذراً سيدي القارئ فأنا بصدد أن أخلع قبعتي وملابسي الأنيقة لألبس أبسط ملابسني وأتحدث بأبسط كلماتي عن أدق وأرق أفكار مشاعر قرأتها للكاتب إريك إيمانويل شميت ووجدت أنني مطالب بنقل تلك الأفكار والمشاعر إليك.

أوسكار والسيدة الوردية

عزيزي ربنا:

أنا إسمي أوسكار، عندي 10 سنين، ولّعت في الكلب والقطة والبيت (و اتهبألي، إن السمك الذهبي اللي كان جوه البيت هوه كمان اتشوى من النار)، وباكتب لك لأول مرة، علشان قبل كده ما كانش عندي وقت - المدرسة بقي وانت فاهم.

من الأول أحب أقولك إن أنا ما باطيقش الكتابة. باكتب بس لو ضغطوا عليّ! أصل أنا ما باطيقش لا الكسرة ولا الفتحة ولا الضمة. ما باطيقش الابتسامات الصفراء والكذب. الكتابة - دي حاجة بتاعة الكبار.

وعلشان أثبت لك اللي باقوله خد عندك مثلاً بداية الجواب بتاعي: "أنا إسمي أوسكار، عندي 10 سنين، ولّعت في الكلب والقطة والبيت (و اتهبألي، إن السمك الذهبي هوه كمان اتشوى من النار)، وباكتب لك لأول مرة، علشان قبل كده ما كانش عندي وقت - علشان المدرسة...". كان ممكن أكتب لك: "الناس بتسميني يا أفرع، شكلي زي ما يكون عندي 7 سنين، عايش في المستشفى، علشان عندي سرطان، وما كنتش باكتب لك قبل كده لأنني ماكنتش أعرف إنك موجود"

لو كنت كتبت زي ما وريتك دلوقت، كنت هتاخذ عني فكرة وحشة وما كنتش هتاخذ بالك مني وأنا الحقيقة محتاج إنك تاخذ بالك مني.

و يا ريت لو عندك وقت تعمل لي خدمتين تلاتة.

هاشرح لك.

المستشفى اللي انا فيها مكان جميل.كل اللي حواليا كبار، ومبسوطين وبيتكلموا بصوت عالي، فيه لعب كثير، ودادات وردية اللي همه بيلعبوا مع الأطفال اللي قدي زي اينشتين وفشار وبسطرة.

باختصار، اللي عيان وعائش هنا في المستشفى ممكن يرتاح آخر راحة.

بس أنا بقى الحقيقة ما بقتش قادر أرتاح، بعد عملية زرع النخاع ما بقتش قادر استمتع بأي حاجة.كل لما الدكتور دوسلدورف بيجي يبص عليا الصبح وما بيعرفش يسمع النبض بيزعل مني قوي.بيبص عليا زي ما اكون أنا اللي غلطان. مع اني حاولت على قد ما أقدر اني أكون كويس في العملية وسبتهم ينيموني بهدوء وخذت كل الدوا اللي قالوا لي عليه وما صرختش حتى لما كنت باتوجع. أحياناً باقى عاوز أزقق فيه إن ممكن يكون هو السبب بحواجه السودا الثقيلة ، هو اللي ممكن يكون السبب في كل اللي أنا فيه ..بس شكله الحقيقة بيصعب عليّ ، والزعيق بيتحشر في زوري.و كل ما ببسكت الدكتور دوسلدورف أكثر، كل ما باحس بالذنب أكثر.دلوقت بس فهمت إني عيان وحش لأنني مش قادر أساعدهم على إثبات إن الطب ده حاجة عظيمة.

و الظاهر إن أفكار الدكاترة معدية، ودلوقت كل الممرضات والمساعدين والدادات ببيصوا عليا زي الدكتور دوسلدورف. شكلهم بقى يصعب على الكافر حتى لو أنا مبسوط، بيحاولوا

و بالطريقة دي ماما الوردية قالت لي على السر الفظيع
بتاعها، وهي طبعاً واثقة فيّ إن أنا مش حاقول لحد، بس اللي أنا
مش قادر أفهمه هو إزاي حد ما يقدرش يشوف سنه الحقيقي مع
كل الكرمشة اللي واضحة حوالين عينيها!

مرة ثانية عرفت سر ثاني من أسرارها - ممكن يساعدك يا
ربنا في انك تعرف مامتي الوردية من بين الدادات الوردية- مرة
يا سيدي كنا بنتمشي في جنينة المستشفى ورجليها وقعت في مية
مش نضيفه فلقيتها راحت قايلة كلمة قبيحة

- يلعن أبو...أوحاجة زيّ كده.

- هيهيهي.. مش الكلام ده برضه عيب يا ماما.

- مالکش انت دعوة يا حبيبي، أنا أقول اللي انا عاوزاه.

- هممم...

- واتحرك بسرعة شوية، احنا خارجين نشم هوا ونتحرك
مش خارجين نمشي على قشر بيض.

و لما قعدنا على البينش ناكل بونبوني سألتها:

- إزاي بنقولي ألفاظ زيّ كده يا ماما؟

- الشيء لزوم الشيء يا أوسكار، الشغلانة اللي كنت
باشغلها ما كانش ينفع أكون فيها مؤدّبة طول الوقت، ما
كنتش هأعرف أعيش.

- شغلانة إيه؟

- مش هاتصدقني...

- أحلف لك حاصدك

- المصارعة الحرة الأمريكياني

- معقولة!!!؟

- أيوه أنا كنت مصارعة، وحتى كانوا بيسموني مشرحة لاجيدوك

لما كانت بتجيني أوقات دماغي تودّي وتجيب في أفكار وحشة وماما الوردية كانت عارفة ان ماحدش سامعنا كانت بتحكي لي عن الماتشات المهمة بتاعتها، يعني مثلاً الماتش اللي بينها وبين ليموزين اللانسون أو عن التحدي اللي قعد عشرين سنة بينها وبين الشيطانة سينكلير الهولندية اللي كان عندها مدافع رشاشة بدل صدرها وبالذات كانت بتحكي لي عن كاس العالم لما كان الماتش بينها وبين "أولا أولا" اللي كانوا بيسموها كلبة بوخينفالد واللي ماحدش قدر عليها قبل كده، حتى "أفخاد الصلب" اللي هي كانت المثل الأعلى لماما الوردية لما كانت مصارعة برضه ما قدرتش عليها. كنت باحلم بالماتشات دي وباتخيل صاحبتي ماما الوردية المسلوعة العجوزة اللي لابسة روب وردي بايديها اللي بنترعرش وهي في وسط الحكايات دي بتوقع في المصارعة واحدة ورا الثانية من المصارعات اللي لابسة فنلات رياضية وعاملة مجانص.كنت باتخيل نفسي مكانها وباحس اننا وراي رجالة.

باختصار...لو بعد كل الحكايات اللي أنا حكيتها لك دي يا ربنا ما قدرتش تطلع مامتي الوردية من وسط بقية الدادات يبقى لازم تطلع معاش، ويبقى انت مش قادر تملأ المكان اللي انت قاعد فيه. اتهيألي أنا كنت واضح بما فيه الكفاية.

نرجع بقى لموضوعنا الأساسي:

مرة ثانية عاوز أقول لك ان زراعة النخاع بتاعي زعلت الناس منّي، الكيميا ما كانتش باسطاهم وكان عندهم أمل في زراعة النخاع وللحظة بان إن فيه أمل... دلوقت عندي إحساس

أنه الدكاترة ما بقاش عندها حاجة ثانية تقدر عليها مع إني
باصعب عليهم. الدكتور دوسلدورف - اللي ماما بتقول انه دكتور
حليوة مع ان انا شايف ان حواجه ثقيلة زيادة عن اللزوم- شكله
بقي مهموم وعامل زي ما يكون بابا نويل والهدايا اللي معاه
خلصت وما كفتش كل الأطفال...الجو بقي مكهرب.

كنت باتكلم مع صاحبي "بسطرمة" - هو في الحقيقة اسمه
إيف بس احنا بنقول عليه بسطرمة لأن شكله قريب من البسطرمة
أكثر من أي حاجة ثانية:-

- أنا شايف يا بسطرمة ان الدكاترة ما بقتش بتحبني، أنا
بابوظ لهم مزاجهم

- انت بتقول ايه يا أقرع، الدكاترة دول يا بني ما فيش
حاجة بتأثر فيهم، أهم حاجة في حياتهم انهم يعملوا
عمليات لأي حد في أي حنة على قد ما ربنا يقدرهم، ده
الدكتور بتاعي كان عاوز يعمل لي 6 عمليات.

- يمكن شكك مغري

- الظاهر كده

- طب ليه ما بيقولوا ليش بصراحة ان انا قربت أموت
وخلص؟

و في اللحظة دي بسطرمة عمل زي كل الناس في
المستشفى: اتطرش!

كل ما الناس في المستشفى تسمع كلمة "موت" ، تبطل
تسمعك. تأكد ان الشخص اللي ببسمعك في اللحظة دي بتطلع في
ودانه سدادات هواء وتبص تلاقية فجأة راح مغير الموضوع، أنا
جربت القصة دي مع كل الناس هنا إلا ماما الوردية...بيومها

الصبح كنت عاوز أجرب إذا كانت هي كمان سمعها هيتقل بعد
السؤال بتاعي:

- ماما، اتھياً لي ماحدش عاوز يقول لي ان انا هاموت
قريب.

بصت لي... ياترى ردّ فعلك هابقى زي الباقيين؟ بلاش
أرجوك يا مشرحة لاجيدوك اسمعيني وبلاش تتطرشي!

- و ايه لازمة انهم يقولوا لك يا أوسكار طالما انت عارف
كده لوحدك؟

اوبيا!! سمعت!

- ماما، أظن انهم بيخترعوا مستشفى تانية غير اللي موجودة
في الحقيقة. بيعملوا زي ما يكون الناس بتدخل المستشفى
بس علشان تخف، مع ان فيه ناس بتدخل المستشفى
علشان تموت.

- عندك حق يا أوسكار، بس ده مش في المستشفى بس،
الناس في الدنيا هي كمان بتتسى إن الحياة زائلة وهشة
وهتنتهي وعاشين كأنها مالهاش نهاية.

- العملية اللي عملوها لي ما نجتش، مش كده؟

ماما الوردية ما ردتش عليا ودي كانت طريقتها بدل ما تقول
"أبوة"، ولما اتأكدت ان أنا فهمت وطت عليا وسألنتي:

- بس أنا ما قولتكش حاجة؟ مش كده؟ هه؟!!!

- ولا أي حاجة... عيب

سكتنا شوية على ما هضمنا المعلومات الجديدة دي

- ايه رأيك يا أوسكار لو تكتب لربنا؟

- حتى انت كمان يا ماما، انت آخر واحدة كنت أفكر انها ممكن تضحك عليّ!
- أضحك عليك في ايه؟
- يعني ما كنتش فاكرا انه انت كمان بتكذبي زي بقية الناس
- أنا ما باكدبش
- امال بتضحكي عليّ ليه في موضوع ربنا ده؟ انا مرة ضحكوا عليّ في قصة بابا نويل دي وكفاية !
- أوسكار! ربنا وبابا نويل حاجتين مختلفتين تماماً
- نفس الحاجة، حاجات بيضحك بيها على الناس وخلص
- يعني انت تتوقع ان مصارعة قديمة زيي كسبت 160 ماتش من أصل 160 منهم 43 بالضربة القاضية، تصدق أنه أنا مشرحة لاجيدوك أصدق لثانية واحدة موضوع بابا نويل ده؟
- لأ
- أهوه ، أنا ما باؤمنش بموضوع بابا نويل ده إنما أنا باؤمن برّبنا.
- طبعاً كلامها ده شقلب كل حاجة
- و اكتب لربّنا ليه؟
- علشان ما تحسّش بالوحدة اللي انت حاسس بيها
- إزاي ابقى مش وحيد مع حاجة مش موجودة؟
- مش موجود ليه ؟ خليه انت يبقى موجود علشانك
- و وطت عليّ:

- كل ما هتؤمن بيه أكثر كل ما هيبقى موجود أكثر، ولو
أمنت بيه للأخر هتחס بوجوده الحقيقي وهتبص تلاقيه
ببساعدك.

- طب وأكتب له إيه؟

- احكي له على أفكارك، الأفكار اللي بتفكر فيها وما
بتقولهاش، الأفكار اللي بتيجي على بالك دايمًا، الأفكار
اللي بتقلقك، الأفكار اللي بتقدم جواك وتأخذ مكان أفكار
جديدة واللي لو ما قلتهمش لحد، دماغك حتبقى مزبلة
للأفكار القديمة.

- موافق

- وممكن كمان تتطلب من ربنا انه يحقق لك أمنية كل يوم،
بس بشرط: أمنية واحدة بس كل يوم.

- أي كلام ربنا بتاعك ده يا ماما، مصباح علاء الدين
السحري بيحقق ثلاث أماني مرة واحدة!

- أمنية واحدة في اليوم أحسن من ثلاث أماني في العمر
كله. مش كده؟

- كده! يعني انا ممكن أطلب منه أي حاجة؟ بونبونوي،
لعب، عربية...

- لأ يا أوسكار ربنا مش بابا نويل، تقدر تطلب منه بس
حاجات معنوية.

- زي إيه؟

- تطلب منه الرجولة، الاحتمال، تطلب منه ينور لك طريقك

- طيب، فهمت

- وممكن تطلب منه كمان إنه يرحم ناس تانية عزيزة عليك

- أمنية واحدة في اليوم! وهاطلب حاجات لناس ثانية، أما
أبقى اشوف نفسي الأول يا ماما وبعدين أبقى أشوف اللي
حواليه.

آدي الحكاية يا سيدي، وبمناسبة أول جواب أكتبهولك، أنا
شرحت لك الأحوال هنا في المستشفى اللي شايفتي فيها عقبة في
طريق الطب وعاوز أطلب منك تتورني في الموضوع بتاعي:
يعني أنا باختصار هاخف ولا لأ؟و ياريت لو تجاوبني أه أو لأ...
يعني تحذف الإجابة الغلط وأنا هافهم، اتهايلي مش صعبة دي.

إلى اللقاء بكرة، قبلاتي

أوسكار

ملحوظة: دلوقت أنا مش عارف عنوانك، أعمل إيه !؟

عزيزي ربنا:

مش ممكن... ده انت ما حصلتش!! أنا ما كنتش متخيلاك
جامد قوي كده، جاوبتني حتى قبل ما أبعت لك الجواب، انت
بتعمل كده إزاي؟

النهارده الصبح وأنا قاعد مع صاحبي اينشتين بنلعب شطرنج
في القاعة اللي بنقعد فيها، دخل علينا فشار وقال:

- أهلك جم
- أهلي أنا؟ دول ما بيجوش إلا يوم الحد.
- أنا شفت عربيتهم، جيب حمرا وسقفها أبيض
- مش ممكن

هزيت اكتافي باستهزاء وكملت لعب، اينشتين كان واكل لي
حاجات كتير في الدور اللي كنا بنلعبه وده كان موترني أكثر.
على فكرة اينشتين سموه كده مش علشان هو أدكى واحد فينا، لأ!
علشان راسه قد راسنا مرتين، المرض بناعه اسمه الاستسقاء،
خسارة، لو دماغه دي كانت كبيرة علشان مخه كبير كان عمل
حاجات عظيمة.

ولأن انا كنت باخسر كده كده، سبت الدور ورحت مع فشار
أوضته اللي بتطل على الباركينج بتاع المستشفى. فشار كان عنده
حق، أهلي جم فعلا.

وبالمناسبة يا ربنا أحب أوضح لك حاجة : أنا وأهلي بقينا
عايشين بعيد عن بعض، الأول لما كنت عايش معاهم ما كنتش

شايف كده، انما دلوقت لما ما بقيتش عايش معاهم بقى اتهيألي ان احنا بعاد عن بعض، علشان بقيت باشوفهم مرة واحدة في الأسبوع، يوم الحد لما هما الاتنين بيبقى عندهم أجازة وأنا كمان ما باشتغلش.

- شفت ان انا كان عندي حق، هتديني ايه علشان قلت لك؟

- عندي شوكلاتة بالمكسرات

- ليه انت خلصت الفراولة؟

- أيوة

- خلاص ماشي

طبعاً ما كانش لي حق أدي لفشار شوكلاتة لأنه بيتعالج من السمنة، عنده 9 سنين ووزنه 98 كيلو وطوله متر و10 سنتي، يعني طوله قد عرضه! اللبس الوحيد اللي بيبجي مقاسه هو لبس الرياضة بتاع البولو الأمريكي، و اللبس ده مخطط وبيزغلل العينين لدرجة ان الواحد بيجي له دوار بحر. الحقيقة انه لا أنا ولا أهلي مصدقين انه ممكن يخس، بيحب الأكل قوي وبيصعب علينا علشان كده بندي له اللي بيفضل من الأكل. يعني باكو شوكلاتة في كل الدهن اللي جواه ده هيعمل ايه، يمكن احنا ما ينفعش نعمل كده بس الممرضات همه راخرين بطلوا يدوا له المليينات.

رحت الأوضة بتاعتي علشان أستنى أهلي، في الأول ماخدتش بالي من الوقت، لأنني كان لازم أخذ نفسي، بس بعد شوية ابتديت أخذ بالي انهم كانوا لحقوا يوصلوا 1000 مرة.

و فجأة افكرت همه ممكن يكونوا فين، خرجت في الطريقة واتأكدت انه ماحدثش شاييفني، نزلت على السلم او مشيت في الضلعة لحد ما وصلت لمكتب دكتور دوسلدورف.

فعلاً كانوا عنده، سمعت أصواتهم من وراء الباب، السلم
تعبني وخذت وقت على ما قلبي رجع مكانه. الوقت اللي أنا
استنيتيه علشان أخذ نفسي ده بوظ كل حاجة، سمعت اللي ما كانش
مفروض أسمعه. أمي كانت بتعيط، والدكتور دوسلدورف كان
قاعد يعيد لها جملة واحدة: "أنا عملنا كل اللي قدرنا عليه،
صدقوني أنا عملنا كل حاجة نقدر نعملها"، أبويا كان بيرد عليه
وصوته مخنوق: "أنا مصدقك يا دكتور، أنا ما باشكش في كده
أبدأ".

وأنا كانت وداني لازقة في الباب المعدن وما بقينش عارف
إيه اللي أسقع المعدن ولا جسمي.

بعد كده الدكتور دوسلدورف سألهم:

- تحبوا تشوفوه؟

- أنا مش قادرة إطلاقاً - أمي ردت عليه

باباً ردّ:

- مش المفروض إنه يشوفنا في الحالة دي

ساعتها فهمت إن أهلي جبانات والأوحش من كده أنهم
فاكريني أنا كمان جبان!

لما حسيت بحركة الكراسي في الأوضة عرفت أنهم
هيخرجوا دلوقت ففتحت أول باب قابلني وقفلته عليّ وبالطريقة
دي لاقيت نفسي في دولاب الحيطه اللي بيخزنوا فيه المقشآت
والفرش وقضيت هناك بقية النهار لأن دوليب الحيطه طبعاً (زي
ما انت تلاقيك عارف يا ربنا) بتتفتح من بره بس مش من جوه
زي ما يكون مثلاً خايفين ان المقشآت أو الجرادل ممكن تهرب
بالليل!

المهم ان أنا فضلت - ما اعرفش إزاي - ساكت في الضلمة
وأنا مقفول عليّ، لأني ما كنتش عاوز أشوف حد، وكمان لأن
رجلي وإيديا ما كانوا قادرين يسمعوا كلامي بعد الصدمة اللي
أنا خدتها، بعد اللي أنا سمعته.

قريب من الظهر كده، حسيت بحركة في الدور اللي فوقني،
خطوات ناس، جري وبعدين سمعت ناس بتزعق:

- أوسكار! أوسكار!

عجيني قوي انهم بينادوا عليّ وأنا ما باردش، كان نفسي
أزعل كل الناس اللي في الدنيا.

بعد كده الظاهر ان انا نعست شوية وصحيت على صوت
البوت البلاستيك بتاع مدام ندا الكناسة بتاعتنا. فتحت الدولاب،
واتخطينا احنا الإثنين: هي - لأنها ما كانتش متوقعة تشوفني
هنا، وأنا - لأني نسيت انها ممكن تبقى سودا وتزعق بصوت
عالي كده.

وبعد كده ابتدى الهبل كله بقي.. الدنيا كلها: الدكتور
دوسلدورف والمرضات بتوع الصبح والنوباتجيات
والدادات... المستشفى كلها، وبدل ما يزعقوا لي، وده اللي أنا كنت
منتظره، كانوا زي ما يكونوا همهمه اللي غلطانين، وأنا ساعتها
فهمت طبعا إني لازم أستغل الموقف.

- عاوز أشوف الداوا الوردية

- انت كنت فين يا أوسكار؟ انت كويس؟

- عاوز أشوف الداوا الوردية

- إيه اللي دخلك دولاب المقشاشات؟ كنت بتجري ورا مين؟ سمعت حاجة؟
- عاوز أشوف الداذا الوردية
- اشرب كباية ميه
- لأ، عاوز أشوف الداذا الوردية
- طب كل حنة ...
- لأ، عاوز أشوف الداذا الوردية

تقولش مثلاً حنة صخر جرانيت أو حجر من اللي على البحر أو عامود مسلح أسمنت، ما فيش أي حاجة تعدي منه. أنا حتى ما كنتش باسمع همه بيقولوا إيه. كنت عاوز أشوف ماما الوردية بأي شكل.

دكتور دوسلدورف كان طبعاً محرج قدام زمايله إنه ما بياثرش فيّ خالص. بس الموضوع خلص إنه راح قايلهم:

- خليههم يجيبوا الداذا اللي بيقول عليها
- ساعتها وافقت إننا أستريح ونمت شوية في أوضتي. لما صحيت، ماما الوردية كانت هنا. ابتسمت
- برافو يا أوسكار، عملت اللي في دماغك، واديتهم بالقلم كلهم والنتيجة انهم بقوا بيحسدوني.
- ما يهمنيش
- الناس دي ناس كويسة يا أوسكار، كويسة قوي
- ولا يهمني
- إيه اللي حصل؟

- دكتور دوسلدورف قال لأهلي إنه أنا هاموت، وهمه جريوا، أنا باكرهم

و حكيت لها التفاصيل زي ما باحكليك دلوقت يا ربنا.

- هيبية، ده بيفكرني بالماتش اللي لعبته في بيتيون ضد سارة يوب لا بوم، واحدة مصارعة دهنت نفسها زيت ودخلت الحلبة تقريباً عريانة. كانوا بيسموها تعبان الحلبة، كانت بتتلفظ من إيد الواحد لما تحاول تمسكها. كل المباريات بتاعتها كانت دائماً في بيتيون وكانت بتأخذ الكاس بتاع المدينة كل سنة. و أنا كمان كنت عاوزه أأخذ الكاس.

- وعملت إيه يا ماما؟

- لما ظهرت على الحلبة أصحابي رموا عليها كيس دقيق. الدقيق مع الزيت عملوا شغل هاييل. وحياتك 3 حركات ورفعة كانت مقلوبة على أرض الحلبة. ومن ساعتها ما بقاش اسمها تعبان الحلبة، بقى اسمها اسكالوب بانيه

- معلش يا ماما بس أنا مش شايف العلاقة بين ده وبين اللي بيحصل.

- أنا شايفه، دائماً فيه حل يا أوسكار، دائماً هتلاقي كيس دقيق. لازم نكتب لربنا هو أقوى مني.

- حتى في المصارعة؟

- أيوة حتى في المصارعة، ربنا عارف شغله كويس، حاول يا حبيبي، إيه أكثر حاجة زعلتك؟

- أنا باكره اهلي

- كويس جداً ، اكرهم كمان وكمان

- انت اللي بتقولي كده يا ماما الوردية؟
- أيوة خلي الكره اللي في قلبك يزيد، علشان يبقى عامل زي العضمة في بق الكلب.لما تبطل تعضها هتفهم إن كل ده مالوش أي معنى.اكتب لربنا عن كل اللي حصل واطلب منه في جوابك إنه يزورك.
- هوه بيقدر يتحرك؟
- بطريقته الخاصة طبعاً بيقدر، بس مش كثير، نادر يعني لما بيتحرك.
- ليه؟ هوه كمان عيان؟
- و هنا فهمت من تنهيدة ماما الوردية إنها مش عايزة تعرفني إن حالتك انت كمان يا ربنا يعني مش ولا بد.
- أهلك يا أوسكار ما كلموكش خلص عن ربنا؟
- ما بلاش نفتكرهم دلوقت.أهلي وحشين
- طبعاً وحشين . بس ما اتكلموش معاك أبداً عن ربنا؟
- اكلمو معاي مرة واحدة، بس علشان يقولوا انهم ما عادوش بيؤمنوا بيه.هما بيؤمنوا في بابا نويل.
- معقوله هما وحشين للدرجة دي؟
- تصوري بقى!لما مرة رجعت من المدرسة وقلت لهم إن أنا عرفت إن ما فيش بابا نويل ولا حاجة كانوا زي ما يكون وقعوا من القمر.و طبعاً لأن أنا زهقت من شكلي وأنا عبيط وأهلي بيضحكوا عليّ بالكلام الفاضي ده، همه حلفوا لي إنهم ما كانوا بيضحكوا عليّ وكانوا فعلاً فاكرين إنه موجود.دلوقت زعلوا جداً - همه قالوا كده -

زعلوا قوي جداً لما عرفوا إنه في الحقيقة بابا نويل مش موجود! بزمنك مش اتنين كبار إنما عبط ، مش باقولك!

- عاوز تقولي إنهم ما بيؤمنوش بربنا؟

- أيوة

- و انت ما فكرتش في الموضوع ده ولا مرة؟

- لو ابتديت أهتم باللي بيفكر فيه العبط مش حيفضل عندي وقت لأفكار الناس الذكية

- عندك حق، يعني معنى كده انت شايف إن أهلك عبط؟

- عبط بحق وحقيقي يا مدام

- طيب أما هما مش صح وما بيؤمنوش ليه انت ما تتأكدش وتطلب منه إنه يزورك؟

- حاضر بس انت قلت إنه عيان مش كده؟

- لأ بس الفكرة في إنه ليه طريقته في الزيارة.ممكن يظهر لك في أفكارك... في خيالك.

- عجبتي الحتة دي قوي ، هايل. وماما الوردية كمان قالت لي:

- هتشوف إن زيارته هتفيدك قوي

- أوكي، هاكلم معاه، بس أكثر زيارة بتفيدني لحد دلوقت هي زيارتك إنت.

- ماما الوردية ابتسمت وقربت مني - زي ما تكون مكسوفة -
علشان تبوسني ف خدي بس ما قدرتش تبوسني ونظرتها كانت زي ما تكون بتطلب مني إذن.

- ماشي، أوكي...بوسيني، ومش ح أقول لحد، مش حابوظ
سمعتك بتاعة المصارعة.

شفايفها لمست خدي، انبسطت إنها باسنتي وحسيت إنني
باغير وحسيت بدفا، ريحتها كانت صابون وبودرة.

- هاتيحي تاني إمتي؟

- أقدر آجي مرتين في الأسبوع بس.

- ما ينفعش الكلام ده يا ماما الوردية! ما عنديش استعداد
لسة أستنى 3 ايام بحالهم.

- قواعد المستشفى بتقول كده.

- و مين اللي حط القواعد دي؟

- دكتور دوسلدورف

- دكتور دوسلدورف لما بيشفوني ببيقى هيعملها على
روحه من الخوف، روجي اطلبي منه إذن، مدام أنا مش
باهزر.

بصت عليّ وهي مش متأكدة.

- أنا مش باهزر.لو ما جيتيليش كل يوم، مش حاكتب لربنا.

- هاحاول.

ماما الوردية مشيت وأنا قعدت أعيط.ما كنتش عارف قبل
اللحظة دي قد إيه أنا محتاج مساعدة.ما كنتش فاهم قد إيه انا
عيان.أول ما فكرت في اني مش هاشوف أمي الوردية، ابتديت
أفهم كل ده، والدموع بقت بتنزّل لوحدها وتحرق خدودي.

لحسن الحظ قدرت أمسك نفسي قبل ما هي تيجي.

- كله تمام:خدت منه إذن إني آجي لك كل يوم في ال12 يوم اللي جايبين.

- تيجي لي أنا لوحدي بس؟

- أيوة ليك إنت لوحديك بس يا أوسكار. 12 يوم.

وساعتها ما عرفتش إيه اللي حصل لي، بس دموعي رجعت تنزل تاني لوحدها وما قدرتش أبطل عياط.مع إني عارف إنه الولاد مش المفروض يعيطوا.بالذات واحد زيي براسي القرعة اللي مخليه شكلي لا هوه ولد ولا بنت، شكلي زي ما اكون من المريخ.بس هانعمل إيه: المهم إني ما عرفتش أبطل عياط.

- 12 يوم؟ يعني حالتي وحشة للدرجة دي يا ماما؟

هي كمان كانت هتعيط بس مسكت نفسها على الآخر، الظاهر إن المصارعة خلتها تعرف تمسك نفسها كويس، قعدت أتفرج عليها ونسيت اللي أنا فيه شوية.

- النهاردة كام في الشهر يا أوسكار؟

- يعني مش شايفة في النتيجة؟ النهاردة 19 ديسمبر.

- البلد اللي أنا منها فيها أسطورة بتقول إنه ممكن من آخر 12 يوم في السنة تقدر تعرف الجو هيبقى عامل إزاي في ال12 شهر بتوع السنة الجديدة. علشان تعرف الجو في كل شهر لازم تاخذ بالك من الجو في كل يوم من آخر 12 يوم في السنة. 19 ديسمبر هو يناير، 20 ديسمبر فبراير وكدة يعني لحد 31 ديسمبر اللي هو هيبقى زي ديسمبر من السنة الجديدة.

- معقولة؟
- دي أسطورة، أسطورة عن 12 يوم بتوع التنبؤ بالسنة الجديدة. بس أنا عاوزة العب معاك اللعبة دي. يعني نبتدي من النهاردة تبص على كل يوم وتتخيل إن كل يوم بعشر سنين.
- بعشر سنين؟
- أيوة . يوم واحد بعشر سنين.
- يعني كمان 12 يوم هيبقى عندي 130 سنة!
- أيوة، تصوّر؟

ماما الوردية باستني- عجبته اللعبة الظاهر- وبعدين مشيت.

آدي الحكاية يا ربنا: يعني أنا اتولدت النهاردة الصبح وطبعاً ما قدرتش أوعى على طول اللي بيحصل، ابتديت أفهم على الضهر كده، في سن خمس سنين كنت ابتديت أفهم شوية بس الأخبار ما كانتش ولايد. النهاردة بالليل عندي عشر سنين، سن أفدر أفهم فيه. علشان كده بانتهز الفرصة دي وباطلب منك حاجة واحدة: لما يبقى عندك لي أخبار، زي النهاردة كدة الضهر، ابقى قولها لي بطريقة أخف من كده، مش دوغري كده خبط لزيق.شكراً.

إلى اللقاء بكره، قبلاتي

أوسكار

ملحوظة: عاوز أطلب كمان حاجة صغيرة، أنا عرف إنه ليّ حاجة واحدة أطلبها في اليوم بس الطلاب الأولاني كان نصيحة أكثر منه طلب.

أنا موافق إن انت تزورني زيارة قصيرة. في افكاري طبعاً. اتهيألي هتبقى حاجة جميلة. أنا نفسي إنك تيجي. ساعات الشغل بتاعتي من 8 الصبح لحد 9 بالليل بقية الوقت بانام. أحياناً باغفل الصبح علشان العلاج. بس حتى لو كنت نايم، صحيني وقلبك جامد. أظن تبقى غباوة لو الواحد يضيع فرصة زي كده علشان فرق المواعيد. مش كده برضه؟

عزيزي ربنا:

النهاردة سن المراهقة بتاعتي، والمسائل مش ماشية بهدوء.هنعمل إيه الدنيا كده!كل مشاكلي - مع اصحابي ومع أهلي - من ورا البنات. أنا سعيد إنه بالليل لَمَّا أتم العشرين هاقدر أستريح من كل ده وأبص عليه على إنه جزء من الماضي. عموماً أنا متشكر على البلوغ والكلام ده كله بس مش هاتكلم في المواضيع دي أكثر من كده.

بداية أحب ألفت نظرك يا ربنا إن انت ما زرتتيش. انا النهارده ما نمتش طول الليل طبعاً علشان مشاكل البلوغ وانت عارف وبالتالي ما كانش ممكن تيجي وما اخدش بالي وبعدين أنا باقول لك للمرة الثانية: حتى لو لقيتني نايم صحيني.

لما صحيت النهارده لقيت ماما الوردية هنا.حكيت لي على الفطار على الماتش بتاعها مع "صدر الملكة" المصارعة البلجيكية اللي كانت بتاكل 3 كيلو لحمه نية في اليوم وبتبلع ببرميل بييرة بحاله.قوة "صدر الملكة" زي ما تقول كانت في النفس بتاعها،اللي كان منتن من اللحمه النبة اللي خمرتها البييرة، كانت بس تنفخ في اللي قدامها وهو يرجع لوحده ويتقلب على اللي قاعدين.علشان ماما الوردية تغلبها كان لازم تفكر في طريقة جديدة... لبست كمامة منقوعة في لافندر وسمت نفسها جلاد كاربنتر.زي ما دايماً هي بتقول إن المصارعة مش بس عضلات إنما لازم كمان دماغك تشتغل.

- مين اللي بيعجبك يا أوسكار؟

- هنا في المستشفى؟

- أيوة

- بسطرمة، اينشتين، فشار .

- و من البنات؟

السؤال ده حيرني.و ما كنتش عاوز أجاب عليه بس ماما
الوردية كانت مستنية إجابة الواحد طبيعي ما ينفعش يلف ويدور
مع واحدة مصارعة عالمية زيها.

- بيجي بلو

بيجي بلو دي بنت زرقا، عابشة في قبل آخر أوضة في
الكوريدور.ضحكتها جميلة قوي، بس تقريباً ما بتكلّمش.زي ما
تكون ساحرة نزلت في المستشفى دقيقتين وماشية.المرض بتاعها
صعب، مشكلة في الدم، ما بيوصلش للرئتين علشان كده جردها
لونه بيبقى مزرق.و هي مستنية العملية علشان جردها يرجع
وردي ولو إني شايف إنها حلوة وهي زرقا.هي دي بيجي
بلو.حواليها سحابة وسكون.تقرب منها زي ما تكون داخل
الكنيسة.

- وانت قلت لها ؟

- وهوه انا عبيط علشان أروح لها كده من الباب للطاق
وأقول لها:"بيجي بلو، انا معجب ببيك"؟

- وليه لأ؟

- انا مش متأكد إنها أصلاً تعرف إن أنا موجود.

- بالعكس...ده سبب إتك تروح لها.

- إنت مش شايفة راسي عاملة إزاي؟لو كانت هي بتحب الناس اللي جايبين من كواكب تانية كان يبقى معلش ، بس ما تهباليش.

- بس انا شايفاك جميل جداً يا أوسكار .

الجملة دي وقفت الحوار شوية .حلو إن الواحد يسمع الكلام ده، الحاجات اللي زي دي بتشبع غرور الواحد بس مش فاهم الواحد يرد يقول إيه.

- انا مش ناوي أغريها بشكلي .

- إنت حاسس ناحيتها بايه؟

- نفسي أبقى انا اللي باحميها من الأشباح .

- إيه ده؟ هوّ فيه هنا أشباح بتطلع؟

- أيوة.كل ليلة.مش عارف حتى ليه، بيطلعوا يصحّونا .يقرصونا (قرصتهم بتوجع على فكرة) وما حدش بيعرف يشوفهم وبتبقى حاجة مرعبة وبعد كده مابنعرفش ننام .

- و الأشباح بتطلع لك كثير؟

- لأ، أنا نومي ثقيل إنما باسمع بيحي بتزعق في نص الليل .ونفسي أبقى انا اللي باحميها منهم .

- قول لها الموضوع ده .

- عموماً أنا غالباً مش حاقدّر أدافع عنها لأنه ممنوع نخرج بالليل من الأوض بتاعتنا .القوانين كده .

- ويعني هي الأشباح تعرف القوانين دي؟ لأ طبعاً. اضحك عليهم: هم لو سمعوك بتقول لبيجي بلو إنك هتحميها منهم مش هيستجروا بيجو لها تاني.

- بس انا... أنا...

- إنت عندك كام سنة يا أوسكار؟

- مش عارف، هو الساعة كام دلوقت؟

- الساعة دلوقت عشرة .يعني إنت قربت على 15 سنة. إنت مش شايف إنه أن الأوان إنك تبقى أشجع من كده في عواطفك؟

الساعة عشرة ونص خدت بعضي ورحت للأوضة بتاعتها ،
الباب كان موارب.

- بيجي، إزيك، أنا أوسكار

بيجي كانت نايمة وكانت شبه الأميرة بتاعة حكاية الأقرام السبعة اللي مستتية الأمير، لما كل الأقرام السبعة الشريرة افكرتها ماتت. شبه الأميرة وهي في الصور اللي فيها تلج لما التلج يبقى شكله مزرق من كتر بياضه.

بيجي بلو لفت وبصت لي، وأنا فكرت بيني وبين نفسي: "يا ترى هي شايفاني أمير ولا واحد من الأقرام السبعة". الحقيقة أنا شكلي أقرب للأقرام براسي الفرعة دي، بس هي ما قالتش حاجة، ودي كانت أجمل حاجة فيها: ما بتقولش أي حاجة ومخيلة كل حاجة غامضة.

- أنا جاي أقول لك إن من الليلة دي أنا هاقف على باب أوضتك، لو ما عندكيش مانع، علشان احملك من الأشباح.

بصت لي، ورموشها بربشت. كل حاجة في اللحظة دي كانت عاملة زي ما تكون بالتصوير البطيء، الهواء كان فاضي والسكوت كان مالوش صوت، وأنا كنت باتحرك زي ما اكون باتحرك في المية، و كل حاجة بتتغير كل ما اقرب من السرير بتاعها اللي عليه إضاءة مش مفهوم رايحة فين.

- استنى عندك... استنى يا أقرع: أنا اللي هاحمي بيجي بلو!

فشار ظهر في فتحة الباب ، الحقيقة هو ملا فتحة الباب بجسمه.

أنا اتخضيت. طبعاً حمايته هو هتكون أضمن: لأن مافيش شبح أصلاً هيقدر يعدّي من الباب.

غمز لبيجي.

- يا بيجي! مش انا وانت صحاب؟هه؟

بيجي بصت على السقف. وفشار خد سكوتها على إن هي موافقة. وطرمني من الأوضة

- لو عاوز بنت ، خد ساندرينا، مافيش صيد هنا يا بابا.

- بأى حق؟

- بحق اللي جه الأول: انا جيت هنا قبلك. لو مش عاجبك يلى نتخانق.

و النتيجة إنه عاجبني جداً، تعبت شوية ورحت أقعد في أوضة اللعب. ساندرينا طلعت بالصدفة هناك، ساندرينا عندها لوكميا زيي، بس العلاج زي ما يكون جايب نتيجة معاها.

سموها "الصينية" علشان الباروكة السوداء اللي شعرها بيلمع اللي هي لابساها والقصة اللي عاملاها. بصت علي وعملت بالونة باللبانة اللي فيها.

- ممكن تبوسني لو عاوز.
- و أبوسك ليه اللبانة اللي في بقك مش كفاية؟
- أصل إنت عبيط يا بني، وتلافيك أصلاً ما بتعرفش تبوس. تراهن إن انت عمرك ما جربت؟
- هيهيهي، ضحككتيني! يعني يبقى عندي 15 سنة وعمرى ما جربت أبوس. أحب أقول لك إنك غطانة.
- سألتي ساندرينا وهي مستغربة:
- إنت عندك 15 سنة؟
- بصيت في الساعة
- أبوة، تميت الـ 15
- أنا كان نفسي دائماً إن حد كبير يبوسني ، يعني مثلاً ولد عنده 15 سنة.
- طبعاً طبعاً فاهم.

و ساعتها فجأة سانرينا راحت مغيرة شكل وشها، ومدت بوزها لقدام (تخيل كده زي البتاعة البلاستيك اللي بتتلزق على الإزاز)، وأنا فهمت إنها بكده مستتياني أبوسها.

إدورت لقيت كل اصحابي واقفين بيتفرجوا، يعني مافيش غير حل واحد، لازم أطلع راجل .. أن الأوان.

قربت منها وبستها، راحت هي ماسكاني بدراعاتها وأنا مش قادر أفلفص، وبقّي اتيل وفجأة من غير أي إنذار دخلت اللبانة بتاعتها في بقي، وأنا رحت بالعها من المفاجأة... الحركة دي غاظتني جداً.

في اللحظة دي لقيت حد بيخبط على ضهري... أصل المصايب لما بتيجي بتيجي مرّة واحدة: أهلي!... النهاردة الحد وأنا نسيت خالص!

- مش هتعرّفنا على صاحبك يا أوسكار؟
- دي مش صاحبتني
- و ماله مش ممكن يعني تعرفنا عليها؟
- ساندرينا - أهلي - ساندرينا.
- فرصة سعيدة جداً. ساندرينا الصينية سلّمت على أهلي بطريقة رسمية.
- كان نفسي ساعتها أخنقها.
- لو تحب... ساندرينا ممكن تيجي معنا أوضتك؟
- لأ، ساندرينا هتفضل هنا.
- لما رجعنا الأوضة حسيت إنه أنا تعبان فنمت شوية. كده كده أنا ما كنتش عاوز أتكلم معاهم.

لما صحيت، ابتدوا يدّوني هدايا. من ساعة ما دخلت المستشفى أهلي بقوا بيستصعبوا يتكلموا معايا، علشان كده بقوا بيحببوا لي هدايا وكل الوقت اللي بعد الضهر باقعد معاهم نقرا قواعد اللعب وطريقة الاستخدام للعب اللي بيحببوها.

بابا مستحيل يزهد من قراية كل النشرات اللي بتيجي مع الأجهزة، حتى لو النشرة بالتركي أو بالياباني ، مافيش حاجة ممكن توقفه، حتلاقيه يدخل على الرسومات والخرايط. بابا ده أحسن واحد في الدنيا يبوظ أيام الأجازة.

النهارده جاب لي جهاز بيك اب. حتى لو ما كنتش عاوز ما كنتش أقدر أرفض.

- انتو جيتم امبارح؟
- امبارح؟ جبت الكلام ده منين؟ احنا ما بنقدرش نيجي إلا يوم الحد، بتسأل ليه؟
- الولاد شافوا العربية بتاعتكو هنا امبارح
- يعني هو الدنيا ما فيهاش غير عربية واحدة جيب حمراء، فيه عربيات كتير شبه بتاعتنا.
- طبعاً، زي ما يكون غرب. حاجة تزعل

و رحت بعد كده مورّيهم.خدت الجهاز اللي جابوهولي وقعدت أسمع وهما قاعدين اسطوانة "كسارة البندق" مرتين ورا بعض، ولمدة ساعتين ما قدروش يقولوا ولا كلمة. يستاهلوا.

- عجبك الهدية؟
- آه جداً، بتخلي الواحد عاوز ينام

فهموا انهم لازم يمشوا.كان واضح طبعاً انهم متوترين.كان باين انهم عاوزين يقولوا حاجة ومش عارفين.و أنا كنت مبسوط وأنا قاعد أتفرج عليهم في الحالة دي بيتعدبوا همّا كمان.

ماما اترمت عليّ وحضنتني جامد قوي، زيادة عن اللازم،
وقالت بصوت مجنون:

- أوسكار يا حبيبي، انا باحبك قوي، أنا باحبك جامد قوي.

كنت عاوز أفلفص منها بس في الآخر سبت نفسي. افنكرت
أيام زمان لما كان الدلع بتاعها بسيط ورفيق، لَمَّا كانت بتقول لي
انها بتحبني من غير الكأبة اللي ماليه صوتها دي.

بعد كده كنت عاوز انام شوية.

ماما الوردية بطلة الصحيان. دايماً بالاقبها مستتيني لَمَّا
باصحى ودايماً مبتسمة في اللحظة اللي بافتح فيها عيني.

- ها؟ أهلك عاملين إيه؟

- مافيش، عادي. إدوني هدية "كسارة البندق".

- "كسارة البندق"؟ هايل، كان عندي واحدة صاحبتني كانوا
مسمينها كده. بطلة درجة أولى، كانت بتكسر رقبة اللي
بيلعبوا ضدها عن طريق انها بتحطها بين رجليها...
وبيجي بلو ، رحلت لها؟

- بلاش نتكلم في الموضوع ده تاني، لقيتها مخطوبة
لفشار.

- هي اللي قالت لك كده؟

- لأ، هو اللي قال لي.

- كذاب!

- ما تهيليش. انا متأكد انه عاجبها أكثر مني، هو برضه
أقوى مِنِّي وممكن الاعتماد عليه.

- كل ده كلام فاضي، وانا باقول لك أهوه! انا كان شكلي في الحلبة زي الفار بس كنت باكسب مصارعين شبه الحيتان أو الخراثيت. يعني خد عندك مثلاً "بلوم بودينج" الإيرلندية اللي كان وزنها قبل الأكل وبالملابس الداخلية بس 150 كيلو يعني موسوعة جينيس بالنسبة لها ولا حاجة. عرض رقبتها كان قريب من عرض الحوض بتاعي، مجانصها عاملة زي رجلي، رجليها ما تقدرش تحوطها بدراعاتك. مافيش وسط أصلاً، بالعربي مافيش حثة تقدر تمسكها منها أساساً. ما تتغلبش!

- و قدرت تغلبها إزاي؟

- طالما ما فيش حثة تتمسك منها ، يعني مدورة وممكن تندرج. خليتها تجري كثير علشان تتعب، وبعد كده وقعنتها على ضهرها. بلوم بودينج كانت محتاجة ونش علشان يقومها على رجليها. إنت يا بني عضمك خفيف وما عندكش لحمة كثير - الحق يتقال - و علشان تعجب حد العضم واللحم مش كفاية، لازم تبقى روحك فيها ميزات كثيرة وإنت روحك مليانة ميزات.

- انا؟

- روح لبيجي بلو وقول لها على اللي في قلبك.

- أنا تعبان شوية

- تعبان؟ ليه إنت عندك كام سنة دلوقت؟ 18؟ الناس ما بتتعيش في 18 سنة.

ماما الوردية دي عليها طريقة في الكلام تخلي الواحد يتملي طاقة.

الليل دخل والأصوات بقت باينة أكثر، والمشمع اللي في أرض الكوريدور في المستشفى كان بيعكس ضوء القمر.

دخلت الأوضة عند بيجي بلو ومديت لها ايديه بجهاز الاسطوانات.

- اتفضلي يا بيجي... اسمعي فالس عرايس الثلج. فالس جميل وكل ما باسمعه بافتكر ك.

بيجي سمعت فالس عرايس الثلج. ضحكت زي ما يكون الفالس ده صاحبها من زمان وقال لها حاجة في ودنها.

رجعت لي الجهاز وقالت:

- جميل قوي.

ده كان أول كلام تقوله. بالذمة مش دي أجمل بداية؟

- بيجي بلو أنا عاوز أقول لك : أنا مش عاوزهم يعملوا لك العملية، انت حلوة كده زي ما انت . اللون الأزرق لايق عليك جداً.

كنت شايف كويس إزاي كلامي عاجبها، بس انا ما كنتش باقول كده علشان كلامي يعجبها بس كان واضح إنه عاجبها.

- أنا عاوزاك إنت يا أوسكار تحميني من الأشباح.

- تقدرني تعتمدي عليّ يا بيجي.

انا كنت فخور قوي إنه أنا اللي في الآخر انتصرت!

- أوسكار ممكن تبوسني!!؟

الظاهر إن البوس ده عند البنات هو أهم حاجة في الدنيا، ما
يقدروش يعيشوا من غيره. بس بيجي بلو ما كانتش صايعة زي
الصينية، إدتني خدّها أبوسه...بس البوسة دي خلّنتي أعرق.

- تصبّحي على خير يا بيّجي

- تصبّح على خير يا أوسكار

آدي اليوم بتاعي يا ربنا. دلوقت بس فهمت ليه بيّسموا
المراهقة سن صعب. هو فعلاً صعب بس بعد العشرين كل حاجة
بتمشي كويس.

ودلوقت بابعت لك الطلب بتاع النهارده: أنا عاوز أجوّز
بيّجي بلو. أنا مش متأكد إذا كان الجواز بقى يعتبر طلب روحاني
ولا مش روحاني، يعني مش عارف إذا كان داخل في تخصصك
ولا لأ؟ يا ترى هتقدر تلّبي طلب زي ده زي نوادي التعارف وكده
ولا لأ؟ لو مش هتقدر خلّيني أعرف بسرعة، علشان ألحق أروح
لخاطبة أو اتصرف. أنا ما باستعجلكش ولا حاجة بس عاوز
أفكر إنّه وقتي قليل قوي. وبكده طلب النهارده بيّقى جواز
أوسكار وبيّجي بلو... آه أو لأ...شوف بقى لو هتقدر تعمل ده،
لأن نفسي فيه قوي.

إلى اللقاء بكره، قبلاتي

أوسكار.

ملحوظة: إنما هو بجد عنوانك إيه؟

حصل يا ربّنا ...حصل! أنا وبيجي بلو إجورّنا. النهاردة 21 ديسمبر، وأنا باخلص اللي بيسموه العقد الثالث وبقيت مجوّز. أنا وبيجي قررنا نأجل موضوع العيال دلوقت. أظن إن هيّ لسة مش مستعدّة للخلفة دلوقت.

كل حاجة حصلت إمبراح بالليل.

الساعة واحدة بالليل سمعت بيجي بلو بتتاوه. نطيت من السرير، أشباح! الأشباح بتعذب في بيجي بلو اللي أنا وعدتها إنه أنا هاحمياها منهم. دلوقت هتقول عليّ إن أنا بتاع كلام وهتبتطل تكلمني وهيبقى عندها حق.

قمت وجريت ناحية الصوت. وصلت لأوضة بيجي، ولقيتها قاعدة على سريرها. استغربت لما شافتني، الظاهر إن شكلي كان مخضوض: قعدت قدامي وبقها مقفول والصوت برضه ما بطلش.

ساعتها كملت لحد الأوضة اللي بعدها وفهمت إن اللي ببصرّخ كان بسطرمة. كان بيتقلب في سريريه زي ما يكون كان بيتقلب على نار. حسيت للحظة إن انا مكسوف من نفسي لما افكرت اللي عملته في يوم من الأيام وحرقت البيت والقطة والكلب وشويت السمك الذهبي - اللي اتهيألي إنه غالباً اتسلق ما اتشواش. فكرت في القطة والكلب والسمك حسوا بايه ساعتها وقلت لنفسي ياريتي كنت سيبتهم بدل ما أقعد كل ساعة والتانية أتعذب لما افكرهم وهم بيتحرقوا زي بسطرمة دلوقت اللي بيتعذب حتى مع زرع الجاد اللي عملوهوله وكل المراهم اللي بيحطها.

بسطرمة بعد شوية اتقلب وبطل يصرخ. و أنا رجعت لبيجي بلو.

- يعني مش إنت اللي كنت بتصرّخي يا بيجي؟ أنا كنت فاكّر إنه إنت اللي بتصرخي كل ليلة.
- وانا كنت فاكرة إن إنت اللي بتصرّخ.

بعد الكلمتين دول قفلنا الموضوع ده وابتدينا نتكلم عن نفسنا: اتّضح إننا من زمان واحنا بنفكر في بعض.

بيجي بلو إزرقّت أكثر... (يعني إتكسفت).

- ودلوقت ناوي تعمل إيه يا أوسكار؟
- وإنت يا بيجي؟

حاجة تطير العقل، كمية الحاجات المشتركة اللي بيتّا- نفس الأفكار، نفس الأسئلة.

- تحب تنام معايّ النهاردة؟

البنات دول شيء مش معقول. يعني علشان انا كنت أقول إقتراح زي كده كنت هاضيع ساعات وأسابيع وأشهر على ما أقلبها في دماغي. هيّ قالتها كده بسهولة وبشكل طبيعي ولا كان في أي حاجة.

- أوكي

نمت جنبها. السرير كان ضيق شويّة علينا، بس قضينا ليلة في منتهى الجمال. بيجي كان ريحتها مكسرات، وجلدها كان ناعم زي كف إيدي بس عندها كل جسمها كده مش بس كف الإيد. نمنا

كثير، وشفنا أحلام مع بعض، وعضنا بعض وكل واحد حكي
للتاني عن حياته كلها.

بس الحقيقة لما مدام جوميت، مشرفة الدادات لقبتنا مع بعض
تاني يوم الصبح، عملت فيلم هندي، أوبرا بحق وحقيقي. قعدت
تصرخ وتتنال وتتهبد، والدادا النوباتجية هي راخره انضمت لها
وقعدوا الأول يزعموا في بعض وبعدين زعموا في بيحي وبعدين
في، ويرزعوا في ببيان وينادوا في ناس تانية تيجي تشهد وقعدوا
يكلّموا عنّا وكل ما تيجي سيرتنا يقولوا "المتاعيس دول" مع إن
إحنا ما كناش متاعيس، بالعكس إحنا كنا سعدا جدا. وصول ماما
الوردية بس هو اللي وقف كل الأفلام دي.

- يا ترى ما أنش الأوان تسيبوا الأولاد في حالهم؟ إيه الأهم
من وجهة نظركم- اللوايح ولا المرضي؟ انا ما يهمنيش
اللوايح بتاعتكو دي، بلوها واشربوا ميّتها، دلوقت أنا
عايزة هدوء واللي عاوز يقطع شعره يروح يقطعه في
مكان تاني. المكان ده مش بتاع فضايح.

زي ما بيحصل دايماً مع ماما الوردية، ما ينفعش حد يقف
قصادها أو يعارضها، خدتني لأوضتي، ونمت شوية.

لما صحيت قدرنا نتكلم.

- هم! يعني اللي بينك وبين بيحي بجد يا أوسكار؟
- كل شيء هابل يا ماما، هابل. أنا في غاية السعادة. الليلة
دي أنا وبيحي إتجوزنا.
- إتجوزتم؟
- أبوة. عملنا كل اللي بيعمله الرجل والست لما بيتجوزوا

- يا سلام؟
- أمال إنت فاكرة إيه؟ أنا...بالمناسبة هو الساعة كام دلوقت؟-أنا خلصت العقد الثالث دلوقت باعمل اللي الناس بتعمله في السن ده، مش كده؟
- طبعاً
- و عارفة كمان، الحاجات اللي الواحد كان فاكرها سخيفة في شبابه، البوس والكلام ده كله، دلوقت بقت تعجبني.عجبية الواحد بيتغير إزاي.
- أنا فرحانة لك يا أوسكار. بتكبر بسرعة.
- بس حاجة واحدة اللي لسة مش عارف أعملها، البوس لمّا اللسان بييجي في اللسان.بيجي بلو خايقة لحسن يكون ده هوه اللي بيوجب العيال.إنت إيه رأيك؟
- اتهيألي، عندها حق.
- بجد؟يعني البوس باللسان ممكن يجيب عيال؟معنى كده إنه أنا ممكن أخلف من الصينية.
- هدّي نفسك يا أوسكار، فرص الخلفة من الموضوع ده غالباً نادرة مش كبيرة.
- شكل ماما الوردية وهي بتتكلم عن الموضوع ده كان متأكد وأنا إطمنت شوية ، بس لازم أقول لك الصراحة يا ربنا والسر ده بيني أنا وانت بس: أصل أنا مرة أو يمكن مرتين أو أكثر لساني جه على لسان بيجي بلو.
- نمت شوية، وبعدين اتغدينا كلنا مع بعض أنا وماما الوردية وبيجي بلو وحالتي اتحسننت.

- الواحد تعب النهاردة الصبح
- ده طبعي. ما بين العشرين والخمسة وعشرين الواحد ما بينامش الليالي، سهر وحفلات و حياة ما بتهمدش وما بنقتصدش في الطاقة بتاعتنا. علشان كده بندفع تمن ده بعدين. إيه رأيك نقابل ربنا يا أوسكار؟
- أخيراً لقيت عنوانه؟
- اتهايلى ممكن نلاقيه في الكنيسة

ماما الوردية لبستي زي ما يكون رايعين القطب الشمالي، خدنتي في ايديها وودتتي الكنيسة اللي موجودة جوا الجنية بتاعة المستشفى وسط البحيرات المتلجة، أنا باشرح لك إيه؟ المفروض إنك عارف طبعاً بيتك فين.

أكثر حاجة اندهشت منها كان التمثال بتاعك، مش التمثال نفسه...الحالة اللي انت فيها - عريان (تقريباً)، مسلوع ومرفوع على الصليب بتاعك، وجسمك مليان جروح ودم نازل على أورطك من تحت تاج الشوك وحتى راسك مش عارف تشيلها ونازلة على كتفك. ساعتها انترفزت وفكرت في نفسي وقلت إنه أنا لو ربنا، زيك، ما كنتش خلّيت حد يعمل في كده أبداً.

- ماما الوردية، يعني تقدري تحلفي لي إنه إنت المصارعة القديمة والبطلة الكبيرة بتؤمنني بده؟
- بتقول كده ليه يا أوسكار؟ يعني إيمانك بربنا كان هيزيد لو لقيته في شكل بطل كمال أجسام وعضلاته منفوخة وجسمه بيلمع من الزيت ولابس شورت وحالق شعره كابوريا ؟
- يعني إيه؟!

- فِكر يا أوسكار. إنت حاسس بنفسك قريب من مين أكثر؟
من ربنا اللي ما بيمرش بأي معاناة ولا ربنا اللي بياسي؟
- طبعاً ربنا اللي بياسي. بس لو انا كنت مكانه، لو أنا كنت ربنا وعندي كل الإمكانيات بتاعته ما كنت بعدت عن المعاناة أحسن لي.
- ما حدش يقدر يبعد عن المعاناة . لا ربنا ولا إنت ولا أهلك ولا أنا.
- طيب .و ليكن. بس ليه لازم نعاني؟
- بالظبط، ليه نعاني، هوه فيه معاناة أصلاً؟. بص على وشه كويس. بص بتمعن. إنت شايفه بيعاني؟
- لأ، فعلاً غريبة، شكله زي ما يكون مش بيتألم.
- شفت، لازم نفرّق ما بين العذاب الجسدي والعذاب الروحي.و لو بنحس بالألم الجسدي فالمعاناة الروحية إحنا اللي بنختارها.
- مش فاهم.
- لو دقوا في رجلى أو في كفك مسامير فالحاجة الوحيدة اللي هتحس بيها هي الألم الجسدي، ومع كده فالتفكير في الموت مش لازم يخليك تحس بالألم، لأنك مش عارف الموت عبارة عن إيه يبقى إحساس الألم ده كله متوقف عليك.
- طيب تعرفي إنت ناس فكرة الموت بتبسّطهم؟
- أيوة أعرف، أمي كانت كده، وهي بتموت ابتسمت من الفرحة، كانت مستنيّة بفارغ الصبر وعاوزة تعرف الحاجة اللي لازم تحصل

ما كنتش عاوز أعارضها. كنت عاوز أسمع بقية كلامها فسكنت وفكرت في الكلام اللي قالته.

- بس الناس في الغالب مش فضوليين. بيمسكوا في الحاجة اللي معاهم زي البرغوت ما بيمسك في الودن اللي بيلاقيها. تعال ناخد على سبيل المثال بلوم بودينج، المصارعة اللي أنا حكيت لك عنها، اللي كانت 150 كيلو قبل الأكل. كانت دايماً تقول لي: "متأسفة، بس أنا مش هاموت أساساً، مش موافقة أموت وما انفقتش على كده". غلطانة، ما حدش اتفق معاها على انها هتعيش للأبد! بس هي كانت بتأوح ومؤمنة بالحياة الأبدية وبترفض أي فكرة عن الفناء، وكانت بتنترفز على الآخر لما تسمع حاجة زي كده وتكتب لحد ما خست وسابت المهنة ووزنها نزل لـ 35 كيلو وشكلها بقي عامل زي السمكة المسلوخة واتفكتت حتت. شفت بقي، هي كمان طلعت بتموت زي الناس كلها، بس فكرة الموت بوظت لها حياتها.

- بلوم بودينج كانت غبية يا ماما

- غبية جداً، بس الغباء منتشر يا أوسكار.

وهنا أنا هزيت دماغي لأنني كنت متفق معاها تماماً

- الناس بتخاف من الموت علشان جواهرم خوف من المجهول. وإيه هو المجهول ده؟ أنا باقترح عليك يا أوسكار تبديل المجهول ده بالإيمان. بص على وش ربنا على الصليب: معاناته كلها جسدية، جسدية بس مش روحية لأنه مؤمن. و ساعتها المسامير اللي في رجله وفي يديه مش هيبقى لها معنى، وهي دي ميزة الإيمان. هو ده اللي أنا عاوزة أشرحهولك.

- أوكي يا مدام، لمّا هاخاف من هنا ورايح هاحاول أخلي نفسي أوّمن.

باستتي، وفي الآخر ابتدى يعجبني الجو في الكنيسة الفاضية معاك يا ربّنا: بس شكلك كان مسالم قوي.

لمّا رجعت نمت كثير، بقيت عاوز أنام أكثر وأكثر. بقى عندي حاجة للنوم، قلت لماما الوردية:

- في الحقيقة أنا مش خايف من المجهول، أنا خايف يضيع منّي اللي عرفته.

- أنا بالظبط زيّك يا أوسكار. إيه رأيك نعزم بيجي بلو تشرب معنا شاي؟

بيجي بلو شربت معنا الشاي، هي وماما الوردية انبسطوا من بعض جداً، وضحكنا كثير لمّا ماما الوردية قعدت تحكي لنا عن مصارعتها مع التواعم جيكليت اللي كانوا بيلعبوا على انهم واحدة بس وبعد كل جولة واحدة من التواعم بعد ما تتعب اللي قدامها تسيب الحلبة كأنها رايحة تعمل بيبي وتستخبى في التواليت وأختها الثانية تطلع تكمل الماتش على الحلبة وهي لسّة في الفورمة، وبعدكده أختهم الثالثة وهكذا. وكل الناس كانوا فاكرين انها جيكليت واحدة، عمرها ما بتتعب. ماما الوردية عرفت المقلب ده وحبست أختين في التواليت وكسبت الأخت الثالثة...المصارعة دي رياضة لثيمة فعلاً.

بعد كده ماما الوردية مشيت. الدادات دلوقت بقوا يراقبوني أنا وبيجي زي ما يكون مواد متفجرة. إيه القرف ده بس! هوّه أنا مش عندي ثلاثين سنة خلاص؟! بيجي بلو حلفت لي إنها هتجي لي الليلة دي، أول ما تقدر، وفي المقابل أنا حلفت لها إني المرة دي هنبوس من غير لسان.

في الواقع، الأطفال مش كل حاجة في الدنيا، الواحد برضه لازم يكون عنده وقت يربّيههم.

آدي الحكاية يا ربّنا، مش عارف أطلب منك إيه النهاردة لأن اليوم كان حلو قوي. آه عرفت! خلي العملية بتاعة بيجي بلو بكرة تنجح. مش زي بتاعتي، هه؟! طبعاً إنت فاهم وأنا فاهم.

إلى اللقاء بكره، قبلاتي

أوسكار

ملحوظة: العملية حاجة مش معنوية وممكن تكون مش في إمكانياتك. في الحالة دي خلي بيجي بلو تتبسط وترضى بنتيجة العملية أياً كانت النتيجة. هاعتمد عليك في الموضوع ده.

عزيزي ربّنا

النهاردة عملوا العملية لبيجي بلو. عشت أوحش عشر سنين في عمري. 30 سنة - سن صعب، سن المسئوليات والمتاعب.

الحقيقة، بيجي ما قدرتش تيجي لي بالليل علشان مدام ديوكريو الدادا النوباتجية قعدت عندها طول الليل في أوضتها تحضرها للتخدير، السرير بتاعها طلع العمليات الساعة 8 الصبح. قلبي اتقبض لما شفتم واخدينها العمليات، قد إيه كانت صغيرة ورفيعة، صعب الواحد يشوفها وهي تحت الملاية الخضرا.

ماما الوردية مسكت إيدي علشان ما اتوترش.

- ليه ربّنا بتاعك يا ماما بيخلق ناس زيّي وزي بيجي؟
- ده من حسن الحظ يا أوسكار، من غيركو الحياة ما كانش هيبقى لها طعم.
- لأ، حضرتك مش فاهماني. ليه ربّنا بيخلينا نعيًا؟ معنى كده إنه يا إما شرير يا إما ما بيقدرش على كل حاجة.
- أوسكار، العيا زيه زي الموت قدر مش عقاب.
- باين عليك إنك عمرك ما عيبت
- إنت تعرف إيه عن العيا بتاعي يا أوسكار؟

استغربت لأنني عمري ما فكرت إن ماما الوردية اللي طول عمرها بتضحك وتبتسم وبتأخذ بالها من كل صغيرة وكبيرة عندها هي كمان مشاكل.

- ما تخبيش حاجة عني يا ماما ، قولي لي كل حاجة.أنا دلوقت بقى عندي على الأقل 32 سنة، عندي سرطان ومراتي في اللحظة دي في أوضة العمليات، وبافهم في المشاكل دي.

- أنا باحبك يا أوسكار .

- و أنا كمان. لو عندك مشاكل قولي لي أساعدك
إزاي؟تحبي أتبتاك؟

- تتبتاني؟

- أيوة، زيّ ما اتبتيت برنار لما لقيته بينتك.

- برنار؟

- أيوة الدب بتاعي.لقيته في الدولاب على الرف، برنار ده الدب القديم بتاعي، عينه راحت، وبقه ومناخيره وقعوا ونص نشارة الخشب اللي كانت جواه وقعت، وكله بقى كدمات وتعاوير.هو شبه حضرتك شوية. أنا اتبتيته لما أهلي العبط جابوا لي دب جديد. قال يعني أنا هاقبل دب جديد! اللي فاضل إنهم بيدلوني أنا كمان بأخ جديد! المهم إن أنا من اللحظة دي اتبتيته. وكتبت له كل ممتلكاتي في الوصية بتاعتي.أنا عاوز أتبتاك إنت كمان لو ده هيرفع من روحك المعنوية.

- أيوة ده فعلا هيرفع من روحي المعنوية يا أوسكار .

- يبقى هاتي إيدك يا ماما يا وردية.

بعد كده رحنا أوضة بيجي بلو علشان نوضبها قبل ما ترجع،
جبنا شوكلاتة وحطينا ورد.

دخلت نمت، حاجة تجنن ، الواحد بقى بينام كتير قوي
اليومين دول.

على آخر اليوم ماما الوردية صحّتي وقالت لي إن بيجي بلو
رجعت الأوضة وإن العملية نجحت.

رحنا لبيجي مع بعض. وهناك قابلنا أهلها. مش عارف مين
اللي قال لهم: بيجي ولا ماما الوردية بس شكلهم كان زي اللي
عارفين أنا أطلع مين. واتعاملوا معايا باحترام وقعدوني على
كرسي وسطيهم وبقبت قاعد بأخد بالي من مراتي وسط حمايا
وحماتي.

انبسطت لما لقيت بيجي بلو زي ما هيّ زرقا، دخل الدكتور
دوسلدورف ومسح حواجبه وقال إن كمان كام ساعة الزرقان
هيروح. بصيت على أم بيجي لقيتها مش زرقا بس جميلة قوي
فقلت لنفسي إن مراتي ممكن تبقى باللون اللي هي عاوزاه، أنا
برضه هافضل أحبها.

بيجي فتّحت عينيها، وابتسمت لنا، ليّ ولأهلها ونامت ثاني.

أهلها اطمّنوا، وكان لازم يمشوا.

- إحنا ساييين بنتنا أمانة في رقبتيك. - هو ده اللي
قالوهولي- إحنا عارفين إنك شخص ممكن الإعتماد عليه.

قعدت أنا وماما الوردية لحد ما بيجي فتحت عينها للمرة
الثانية وبعد كده رحت أنام في أوضتي.

و أنا باخّص الجواب أقدر أقول إن اليوم النهاردة كان يوم
موفق. يوم عائلي. اتبنيت ماما الوردية، علاقتي الأسرية بحماي

وحماتي علاقة كويسة، مراتي رجعت لي سليمة معافاة، بس لونها
إوردّ على الساعة 11... مش مهم!

إلى اللقاء بكره، قبلاتي

أوسكار

ملحوظة : مش هاطلب منك حاجة النهاردة، خد لك راحة!

النهاردة انا عندي بين الأربعين والخمسين سنة، وما فيش حاجة باعملها إلا وتطلع حماقة جديدة.

هاحكليك بسرعة، لأن الموضوع مش مستاهل حكايات طويلة. بيجي بلو حالتها اتحسنّت، بس الصينية بايعاز من الأستاذ فشار - اللي همه الاتنين دلوقت طبعاً ما بيقبلونيش - راحت لبيجي بلو وخبصت لها إن أنا بستها في شفايفها.

و بناءً عليه بيجي قالت لي إن اللي بيّنا كله إنتهى. أنا اعترضت وقلت لها إن الصينية دي كانت مجرد طيش شباب، وإن ده كان قبل ما علاقتنا تبتدي وإنه ما ينفعش إنها تخليني أدفع حياتي كلها تمن للماضي اللي عشته. بس كل ده كان من غير فايده. دول حتى إتصاحبوا هي والصينية علشان يغيظوني، وسمعتهم بوداني وهمه بيضحكوا بصوت عالي. وساعتها بقى أنا سمحت لبريجيت، وبريجيت دي كلبة عندها 3 اشهر بتروح للناس كلها وتلحسهم، وطبعاً ده طبيعي لأن الكلاب الصغيرة دايماً بتلحس الناس، سمحت لها النهاردة الصبح لمّا جت لي الأوضة تسلّم عليّ إنها تلحسني من رجلي لراسي. ويا سلام على السعادة اللي كانت فيها! زي ما تكون إتجننت من السعادة! زي ما يكون عملت لأصحابها احتفال حقيقي. المشكلة إنه في الوقت ده أينشتين كان في الطريقة. يمكن دماغه مليانة مئة بس عينيه شغالة. شاف كل حاجة وحكى لبيجي والصينية. و دلوقت الدور كله مسميني الصايح الفاقد مع إن أنا ما باخرجش من الأوضة.

- أنا مش فاهم أنا عملت كده ليه مع بريجيت دي...

- الشيطان شاطر يا أوسكار، والرجالة عادة من سن الأربعين لسن الخمسين يبقوا واثقين في نفسهم ويحاولوا يعرفوا إذا كانوا هيعجبوا ستات تانية غير اللي هم بيحبوهم.
- طيب، نفترض إنه أنا طبيعي، بس اتهيألي ، أحمق برضه ، مش كده؟
- إنت شخص طبيعي جداً يا أوسكار.
- طيب أعمل إيه دلوقت؟
- إنت بتحب مين؟
- بيجي، بيجي وبس.
- قول لها الكلام ده. الجوازة الأولانية عادة بتبقى مش متماسكة قوي وممكن تتكسر في أي لحظة، بس لازم نتعب علشان نحافظ عليها طبعاً لو هي تستاهل ده.
- بكره الكريسماس يا ربّنا، أنا ما كنتش أعرف إن ده بيقى عيد ميلادك.صالحني على بيجي لأنني بقيت حزين بشكل فظيع وحالتي المعنوية في النازل وأنا مش عارف إذا كان السبب في ده راجع لخناقتي أنا وبيجي ولا إيه.

إلى اللقاء بكره، قبلاتي

أوسكار

ملحوظة: حيث بقى إن احنا بقينا أصحاب، قول لي تحب أجيب لك إيه في عيد ميلادك؟

الساعة 8 الصبح قلت لبيجي بلو إن أنا باحبها وما باحبش ولا حبيت حد غيرها وماقدرش أتخيل حياتي من غيرها. عيّت واعترفت لي إن أنا اتسببت في جرحها لأنها هي كمان ما بنحبش حد غيري، وبعدين ما كانتش هتلاقي حد بالذات دلوقت بعد ما لونها خلاص بقى وردي...بعد كده - وده المدهش في الموضوع - قعدنا إحنا الاتنين نعيط سواء، بس كنا في منتهى السعادة. قد إيه الحياة الزوجية دي جميلة!بالذات بعد الخمسين لما نكون عدينا حاجات كثير مع بعض.

أول ما الساعة دقت عشرة افكرت إن النهاردة عيد الميلاد، وإن أنا ما أقدرش أفضل مع بيجي علشان هيحي لها دلوقت عيلتها، اخواتها واعمامها واولاد اعمامها واولاد خالاتها، وأنا لازم أستحمل أهلي اللي ما اعرفش هيحبوا لي إيه هدية؟بازل من 18000 قطعة ولا كتاب باللغة الكردية ولا صندوق جديد معاه طريقة الاستخدام؟ أو يمكن هيحبوا لي بورتريه لي لما كنت لسه بصحتي؟ الواحد ممكن يتوقع أي حماقة من اتنين زي دول مخهم زي العصافير، الواحد معاهم بيخاف من أي حاجة، والواضح حاجة واحدة: إن اليوم ده هيبقى يوم مقنذل.

خدت القرار بسرعة:عملت لنفسي خطة هروب.صفقة تبادل بسيطة:اللعبة لأينشتين، المرتبة الريش لبطرمة، البونبوني لفشار.و مع ملاحظة بعض نتائج المراقبة لقيت إن ماما الوردية وهي ماشية لازم تزوح أوضة تغيير الملابس.و فيه برضه بعض الإقتراضات: اهلي مش هييجوا قبل الساعة 12.كل شيء مشي بسلاسة:الساعة 11:30 ماما الوردية باستنتي واتمنت لي كريسماس سعيد مع أهلي ونزلت تغير هدومها.أنا رحنت مصقر،

راح فشار وأينشتين وبسطرمة ملبسيّتي بسرعة ونزلوني عند عربية ماما الوردية.العربية طلعت معمولة في العصر اللي قبل صناعة العربيات أصلاً، فشار اللي طلع عنده موهبة مذهلة في موضوع كسر الأفقال راجعة لحسن حظه علشان إترّبي في منطقة شعبية، فتح الباب الورّاني وعبّاني في العربية على الأرض بين الكرسي القداماني والكرسي الورّاني وبعدين رجعوا همه التلاتة مبنى المستشفى من غير ما حد ياخذ باله.

بعد شوية، شوية كثير الحقيقة، ماما الوردية ركبت العربية.الموتور قعد يعطس ويكح حاجة بتاعة 15-20 مرة لحد ما العربية اشتعلت وفي الآخر ابتدينا الرحلة في العربية اللي ما يعلم بيها إلا ربّنا. جهاز ما قبل العربية ده كان معجزة، الصوت كان بيبقى عامل زي ما نكون ماشيين على 120 وفي الحقيقة إحنا على أقل من مهلنا والعربية قاعدة تتنطط وهي ماشية زي ما يكون الواحد راح سوق في الأرياف.

الفكرة إن ماما الوردية اتعلمت السواقة بمساعدة صاحبها اللي كان بيسوق عربيات في الأفلام علشان الخدع السينمائية: يعني الإشارات والرصيف والميادين وكل الحاجات دي ما كانش ليها معنى عندها ومن حين لآخر كانت بتطير في الهوا.أمّا في كابينة الطيار فالوضع ما كانش أهدى من برّه، كلكسات وشتايم من النوع التربوي اللي اثر بالإيجاب في ثقافتني اللغوية ، وأنا ببني وبيين نفسي فكرت في إن المصارعة دي مدرسة ممتازة للحياة بحق وحقيقي.

كنت فاكّر إنني هاطلع لماما الوردية وأقولها : "أنا أهوه" لمّا نوصل بس سباق الحواجز اللي كتّا فيه طولٌ وأنا نعست في السكة.على كل الأحوال صحيت في الضلمة والدنيا برد وساكتة ولمّا لقبّيتني نايم لوحدي على مشاية العربية المبلولة أول مرّة أفكر: "يمكن اللي عملته ده كان غلطة.

خرجت من العربية في الوقت اللي كان الثلج بينزل فيه. لازم
أعترف إن الثلج ماكانش جميل في اللحظة دي زي فالس "عرايس
الثلج" في "كسارة البندق". اسناني كانت بتططق لوحدها. شفت
بيت كبير منور، رحت ناحيته، حالتني كانت أوحش من إتي
أضرب الجرس فقعدت أنط علشان أبص من شباك الباب.

ماما الوردية لقبيتني.

- إيه ده.. إيه ده..، وحاولت تقول حاجة.

و بعدين وطّعت عليّ ووشوشتني

- يا حبيبي

ساعتها فكرت، إتي يمكن أكون فعلاً عملت حاجة
غلط. خدنتي الصالون اللي كان فيه شجرة كريسماس كبيرة بنتور،
استغربت من المكان الجميل اللي عابشة فيه ماما الوردية، قعدت
تدفيني قدام النار وشربت أنا وهي شوكلاتة سخنة. اتهيألي إنها
كانت عاوزة تتأكد إن أنا بخير قبل ما تزعق لي على اللي عملته،
علشان كده حاولت على قد ما أقدر أطول الوقت اللي أنا باتدفا
فيه، وعلى فكرة ماكانش الموضوع ده بإيدي قوي لأني كنت
تعبت فعلاً.

- الناس كلها بتدور عليك في المستشفى يا أوسكار. أرض
المعركة مليانة أحداث. أهلك مقهورين وبلغوا البوليس.

- دي حاجة منتظرة منهم، طبعاً فاكرين إن أنا هاجبهم
أكثر لو حطوا في أيدي كلبشات...

- إنت زعلان منهم في إيه؟

- لأنهم خايفين مني. بيخافوا يتكلموا معايّ. و كل ما بيخافوا
أكثر كل ما باحس إن أنا وحش مفترس، مش فاهم أنا

بأعمل لهم إيه بس ببخوفهم؟ هوه أنا شكلي بقى فظيع
للدرجة دي؟ ريحتي وحشة مثلاً؟ بقيت أهبل ومش حاسس
بنفسي؟

- همه مش خايفين منك يا أوسكار، دول خايفين من
المرض.

- المرض بتاعي ده جزء مني.و مش المفروض إنهم
يغيروا تصرفاتهم علشان المرض بتاعي.و لا يعني همه
ما ينفعش يحبوني إلا وأنا بصحتي؟

- همه بيحبوك يا أوسكار.همه قالوا لي كده.

- إنت اتكلمت معاهم؟

- أيوه. وهم غيرانيين مني عليك. لأ، مش بيغيروا يعني،
زعلائين بس.زعلائين علشان مش قادرين يتفاهموا
معاك زي ما احنا بتفاهم مع بعض.

هزيت اكتافي وهديت شويّة وماما الوردية عملت لي
شوكولاتة كمان.

- عارف يا أوسكار.إنت هتموت في يوم من الأيام، بس
همه كمان هيموتوا.

استغربت جداً من الكلام ، عمري ما فكّرت فيه.

- همّ كمان هيموتوا.لوحدهم، وضميرهم هيعذبهم إنهم ما
عرفوش يتصالحوا مع إنهم الوحيد اللي اسمه أوسكار
اللي همه كانوا بيموتوا فيه.

- ما تقوليش كده يا ماما، إنت كده بتزعليني.

– فكَرَ فِيهِمْ يَا أَوْسَكَارَ.إِنْتَ فَهَمْتَ إِنَّكَ هَتَمْتَ قَرِيبَ
عَلْشَانَ إِنْتَ وَوَلَدَ نَبِيهِ جَدًّا.بَسَ إِنْتَ مَا فَهَمْتَشَ إِنْ إِنْتَ
مَشَ هَتَمْتَ لَوْحَدِكَ، كَلْنَا حَنَمْتَ، أَهْلَكَ وَأَنَا فِي يَوْمِ
مَعْلُومِ.

– أَيُوهَ، بَسَ أَنَا اللَّيْ هَامَشِي الْأَوَّلِ.

– بِالضَّبْطِ، إِنْتَ هَتَمَشِي الْأَوَّلِ.بَسَ يَا تَرَى كَوْنَ إِنْكَ
هَتَمَشِي الْأَوَّلِ مَعْنَاهُ إِنْكَ أَحْسَنَ مِنَ الْبَاقِيَيْنِ؟أَوْ مَعْنَاهُ إِنْكَ
تَنْسَى الْبَاقِيَيْنِ مَثَلًا؟

أَدِي بَقِيَّةُ الْحِكَايَةِ بِاخْتِصَارٍ يَا رَبَّنَا عَلْشَانَ إِيدِي بَقْتَ بِتَتَعَبِ
مِنَ الْكِتَابَةِ.مَامَا الْوَرْدِيَّةُ كَلَمْتَ الْمَسْتَشْفَى وَهَمَهُ كَلَمُوا أَهْلِي وَجَمِ
لَلْبَيْتِ بَتَاعَ مَامَا الْوَرْدِيَّةِ وَاحْتَفَلْنَا كَلْنَا سِوَا الْكْرِيسْمَاسِ مَعَ بَعْضِ.

لَمَّا أَهْلِي وَصَلُوا قَلْتُ لَهُمْ:

– أَنَا آسَفٌ إِنْ نَسِيتَ إِنْ إِنْتَوَا كَمَا هَتَمْتُوا فِي يَوْمِ مِنَ
الْأَيَّامِ.

يَمْكُنُ الْجُمْلَةُ دِي فَكَّتْهُمْ شَوِيَّةً، مَشَ عَارَفَ، بَسَ الْحَقِيقَةَ
رَجَعُوا زِي مَا كَانُوا فِي الْأَوَّلِ، وَقَضَيْنَا لَيْلَةَ كْرِيسْمَاسِ جَمِيلَةً
جَدًّا.

وَمِنَ بَابِ التَّحَالِي مَامَا الْوَرْدِيَّةُ حَبَّتْ تَتَفَرَّجَ عَلَى قَدَّاسِ
الْكَرِيسْمَاسِ وَشَرِيطِ مَصَارَعَةَ مَتَسَجَّلَ عَلَى فِيدِيُو.قَالَتْ إِنَّهَا بَقِي
لَهَا سَنِينَ طَوِيلَةً بِتَتَفَرَّجَ عَلَى مَاتَشَ مَصَارَعَةَ الْأَوَّلِ قَبْلَ الْقَدَّاسِ
عَلْشَانَ تَقْدِرُ نَقْفَ عَلَى رَجْلَيْهَا، الْعَادَةُ دِي عِنْدَهَا مِنْ أَمْتَعِ
الْحَاجَاتِ اللَّيْ بِتَعْمَلُهَا.وَالنَّتِيجَةُ إِنْ أَحْنَا انْفَرَّجْنَا عَلَى مَاتَشَ بَيْنِ
مِيفِيسْتُو وَجَانْدَارِكِ، وَاحِدَةً بِمَايُوهُ وَالتَّانِيَّةُ بِقِنَاعِ!نِسْوَانِ حَلْوَةٌ! عَلَى
رَأْيِ بَابَا – هُوَهُ اللَّيْ قَالِ كَدَهُ – وَوَشَّهَ أَحْمَرَ قَوِي، الظَّاهِرِ

علشان المصارعة عجبته.الضرب في الوش كان كتير جداً، اتهيألي لو أنا دخلت مصارعة زي دي كان زمني متّ من زمان بس الظاهر إن المسألة مسألة تدريب زي ما قالت لي ماما الوردية.كل ما تاخذ ضرب في وشك أكثر كل ما تتعود على الضرب.الواحد لازم يتمنى الأحسن.المهم جان دارك كسبت الماتش، مع إن الواحد كان فاكّر إنها صعب تكسب:أكيد زمانك مبسوط من الأخبار دي.

وعلى فكرة، كل سنة وإنّت طيب يا ربّنا.ماما الوردية اللي حطّتي أنام في سرير ابنها الكبير (بيشتغل دكتور بيطري في الكنغو وبيعالج الأفيال) قالت لي إن أنا لّمّا أصلح أهلي هتبقى هدية كويسة ليك في عيد ميلادك.الحقيقة أنا مش شايف إن ده يغني عن الهدية بس طالما ماما الوردية صاحبتك من زمان يبقى هي عارفة.

إلى اللقاء بكرة، قبلاتي

أوسكار

ملحوظة: نسيت أقولك أمنية النهارده:خلي أهلي على طول يبقوا زي النهارده.و أنا كمان.الكريسماس ده كان هاييل، بالذات الماتش بين ميفيستو وجان.حقك عليّ إن أنا ما اتفرجتش على القدس، قفلنا التلفزيون قبل ما يبجي.

تمّيت السّئين، وبادفع تمن الأخطاء اللي عملتها امبارح بالليل.حالتي مش تمام، رجعت المستشفى بكل سرور.الظاهر إنه هي دي الشيوخوخة، السفر والتنطيط ما بقاش ينفع ولا يبسط.و ما عنديش أي رغبة إني أخرج من هنا.اللي ما لحقتش أحكيك عنه في جواب امبارح التمثال بتاع بيجي بلو اللي شفته في البيت بتاع ماما الوردية على الرف فوق السلم.أحلف لك بابه...هيّ الخالق الناطق ومعمولة من الجبس. اللبس والجدد واللون المزرق.ماما الوردية شايفة إن التمثال بتاع مريم العذراء، مامتك على قد ما فهمت اللي الناس بتصلي لها في البيت ده من زمان.و ماما الوردية وافقت تديني التمثال ده هدية. حظيت التمثال عندي على الكومودينو في الركن.كده كده التمثال هيرجع لماما الوردية بما إني اتبنيتها.حالة بيجي بلو اتحسننت.جت لي تزورني على كرسي بعجل. ما عرفتش نفسها في التمثال بس قضينا وقت جميل مع بعض. سمعنا "كسارة البندق" وإحنا ماسكين أيدين بعض، فكرتني بأيام الشباب الجميلة بتاعة زمان.مش هاقدر أكمل أكثر من كده علشان أيدي بقت بتوجعني.الناس هنا كلها بقت عيانة حتى الدكتور دوسلدورف من الشوكولاتة والديك الرومي والمشمر والمحمر والشمبانيا اللي أهلي جابوهم لكل اللي بيشتغلوا في المستشفى. أنا نفسي قوي إنك تزورني بقى.

إلى اللقاء بكره، قبلاتي

أوسكار

النهاردة عندي بين السبعين والثمانين، وفيه حاجات كثيرة ابتديت أراجع نفسي فيها. أولاً أنا استعملت هدية الكريسماس اللي اديتهاي ماما الوردية. مش عارف إذا كنت قلت لك ولا لا؟ نبات من السكر بعيش حياته كلها في يوم واحد، تحط البذرة وتسقيها فيه وهي على طول تطرح سيفان وأفرع وورق وبعدين زهرة وفي الوقت نفسه بذرة جديدة وبعدين يرجع يكرمش وعلى آخر اليوم هوب... حياته تنتهي. هدية عبقرية، شكراً لأنك خلقت النبات ده. النهارده الصبح سقيناه أنا وماما الوردية وأهلي - مش فاكر إذا كنت قلت لك ولا لأ بس أهلي دلوقت عايشين عند ماما الوردية علشان من عندها للمستشفى أقرب - وقدرت أتفرج على حياة النبات ده كلها من الأول للأخر. صحيح النبات صغير والوردة ما تتشافش، ما تتقارنش يعني مع أي وردة كبيرة بس بتعمل كل حاجة واحنا شايفينها، في يوم واحد من غير ما تقف. زي النباتات الكبيرة.

أنا وبيجي بلو قعدنا النهارده نقرا كتير في قاموس المصطلحات الطبية، ده الكتاب المفضل عندها. أصلها مهمة بالأمراض ودايماً بتسأل نفسها سؤال: ياترى هتقابل في حياتها أمراض إيه ثاني في المستقبل؟ عن نفسي قعدت أدور على الكلمات اللي تهمني: "الحياة"، "الموت"، "الإيمان"، "ربنا". مش هتصدقني لو قلت لك إن كل الكلمات دي ما لقيناهاش في القاموس! وطبعاً ده معناه إن لا الحياة ولا الموت ولا الإيمان ولا إنت أمراض. خبر كويس بالتأكيد. بس مش واجب برضه إن في كتاب جد زي ده كان يبقى فيه إجابة عن الأسئلة اللي بجد زي دي؟

- ماما الوردية، متهيألي إن القاموس الطبي ده فيه الحالات الشخصية اللي بتقابل كل واحد لوحده بس ما فيهموش الحاجات اللي بتهم الناس كلها مع بعض.

- أظن أحسن الواحد يدور على الحاجات دي في قاموس فلسفي، يا أوسكار بس حتى هناك لو لقيت المفاهيم اللي بتدور عليها دي هنتخبب ظنك وهتلاقي تفسيرات كتيرة وأجوبة مالهاش عدد.

- إزاي ده؟

- أهم الأسئلة هتفضل برضه أسئلة، أسئلة مليانة غموض.و كل إجابة هتلاقي فيها كلمة "يمكن" . أسئلة قليلة جداً اللي ليها إجابات محددة.

- يعني عاوزة تقولي لي إن "الحياة" مالهاش حل؟

- لأ، عاوزة أقول إن الحياة ليها حلول كتيرة، ما لهاش حل واحد بس.

- بس أنا متهيألي إن الحل الوحيد للحياة هو إنك تعيش.

دخل علينا الدكتور دوسلدورف.و شكله زي ما هوه زي الكلب المضروب، لما تحط على ده حواجه التخينة تلاقى قدامك شكل معبر جداً. سألته:

- هوه إنت بتسرّح حواجبك يا دكتور دوسلدورف؟

بص باستغراب زي ما يكون السؤال كان لماما الوردية أو لأهلي أو زي ما يكون ما سمعش السؤال.خلص الموضوع إنه جاوب: "أيوه" وصوته مخنوق.

- غير تعبير وشك يا دكتور. اسمع: أنا هاقول الصراحة... لأنني طول عمري كنت مطيع في موضوع العلاج، وحضرتك كنت ملتزم جداً في علاقتك بالمرض...سيبك بقي من نبرة الذنب اللي في صوتك دي...مش ذنبك إنك أحياناً بتضطر تقول للناس أخبار وحشة عن المرض بتاعهم بطلاسم باللاتيني وتفسيرات معقدة...هدى نفسك وشيل المسؤولية من على وشك... إنت مش ربنا...مش إنت اللي بتنظم الكون...إنت بس بتصلح...شيل الهم من على كتفك وبطل التوتر اللي إنت فيه ده، وما تحملش نفسك أكثر من طاقتها، يا إما مش هتعمّر كثير في المكان بتاعك.بص لروحك يا دكتور.

دكتور دوسلدورف فتح بقه وهو سامعني لدرجة إن كان ممكن تدخل فيه بيضة بحالها.و بعدين ضحك ضحكة بجد وباسني.

- عندك حق يا أوسكار.شكراً إنك قلت لي كده.
- ولا يهملك يا دكتور.أي خدمة.ابقى تعال لو احتجت حاجة تاني.

أدي حكاية النهاردة يا ربنا. ولسة مستني زيارتك. تعال بقي. ما تقلقش! تعال حتى لو عندي ناس في الوقت ده، أنا بجد هانبسط قوي.

إلى اللقاء بكرة، قبلاتي

أوسكار

عزيزي ربّنا

بيجي بلو سابت المستشفى. روّحت بيتها، لأهلها. أنا مش
عبيط، وعارف إني مش هاشوفها تاني أبدأ. مش هاكتب تاني،
علشان أنا زعلان قوي. إحنا عشنا سوا عمر بحاله أنا وبيجي،
دلوقت بقيت لوحدي خالص، أقرع ومخي بيخرف وعيان ومرمي
في سريري. قد إيه الشيخوخة دي فظيعة.

النهارده أنا مابقيتش باحبك.

أوسكار

عزيزي ربنا

أنا متشكر إنك زرتني.

إنت اخترت اللحظة المناسبة، اللحظة اللي كانت فيها كل حاجة في حياتي ماشية غلط. إوع تكون زعلت من جواب امبارح...مبارح

لمّا صحيت افكرت إن أنا بقى عندي 90 سنة ولقيت دماغي ناحية الشباك أبص على الثلج. و لمّا خمّنت إنك جيت، الصبح طلع، كنت لوحدي على كوكب الأرض. الدنيا كانت بدري لدرجة إن حتى الطيور كانت لسّة نائمة والممرضة النوباتجية مدام ديوكريو كانت بتشخّر.

شفنك وانت بتحاول تعمل الشروق وكان صعب عليك بس إنت أصرّيت فالسما وشها راح مخطوف ورحت انت نافخ في الهوا اللون الأبيض والرمادي والأزرق لحد ما زحزحت الليل ورجعت الحباة للدنيا من غير ما تقف لدقيقة واحدة. ساعتها بس فهمت الفرق بينك وبيننا: إنت واحد عمره ما بيزهق! عمره ما بيتعب. دايماً قاعد بتشتغل! خدوا عندكو آدي الصبح! آدي الليل! دلوقت هيبقى ربيع! أو دلوقت شتا! وآدي بيجي بلو! أو آدي أوسكار! أو ماما الوردية! يااااااااااه.

أنا حسيت بيبك هنا وفهمت إنك هنا. إنت فتحت لي سرّك: بُص دائماً على العالم زي ما تكون بتشوفه لأول مرة. لمّا اتبعت نصيحتك دي وحاولت أمشي عليها وعيت لأول مرة على النور والألوان والطيور والحيوانات. حسيت بالهوا اللي باتنفسه وهوّ بيملا مناخيري. سمعت الأصوات اللي في الطرقة وكأنها أصوات جاية من تحت قبة كاتدرائية. حسيت إن أنا عايش. واطرعشت من

الفرحة الحقيقية.فرحة الحياة ، اترعشت من سعادة الوجود.كنت
طاير من السعادة.

شكراً يا ربنا إنك عملت كل ده علشانى. حسيت إنك خدتنى
من إيدي وبتتمشى بي في قلب سر الوجود علشان أفهم معناه.
متشكر.

إلى اللقاء بكره، قبلاى

أوسكار

ملحوظة: أمنيى: يا ترى تقدر تعمل نفس الحكاية دي (إن
الواحد يشوف زي أول مرّة) لأهلى؟ماما الوردية اتهبألى عارفة
الموضوع ده.و كمان نفسى لو تعمله لبيجي بلو لو كان عندك
وقت.

عزيزي ربنا

تميت ال100 . بانام كثير وصحتي تعبت.

حاولت أشرح لأهلي إن الحياة دي هدية غريبة.في الأول بنتغر فيها: بنبقى فاكرين إن الهدية دي هتفضل معانا ونستخدمها للأبد.و بعد كده ما بنحسش بقيمتها: لما بنفتكر إنها قصيرة ومش كاملة حتى لدرجة إن احنا بنبقى عاوزين نتخلص منها. وفي الآخر بنعرف إنها في الواقع ما كانتش هدية ، ده كان دين.و ساعتها بنحاول نعمل اللي نقدر عليه علشان نرد الدين ده.أنا عندي 100 سنة وعارف أنا باتكلم عن إيه.كل لما بتكبر كل ما ذوقك بيبقى أحسن علشان تقدر الحياة.لازم تبقى فنان وحسك راقى، أي عيّل ممكن يستمتع بالحياة وهو عنده 10 ولا 20 سنة إنما الواحد لما يبقى عنده 100 سنة ومش قادر يتحرك ما بيفضلش حاجة غير العقل اللي الواحد يقدر يستخدمه.مش عارف إذا كنت قدرت أفنعمهم ولا لأ.

زورهم يا رب! انا دوري انتهى وتعبت حبتين.

إلى اللقاء بكره، قبلاي

أوسكار

عزيزي ربّنا

110 سنة. كثير قوي. اتهبألي أنا ابتديت أموت.

أوسكار

عزيزي ربّنا

رحل الطفل.

الآن سوف أظل سيدهً وردية ولكنني لن أعود أبداً أمّا وردية
كما كنت أمّا لأوسكار وحده.

إنطفاً أوسكار صباح اليوم في نصف ساعة، إنطفاً حينما
تركناه أنا ووالداه لنحتسي القهوة. فعلها وحده دوننا. أعتقد أنه اختار
تلك اللحظة بعينها حتى لا يؤلمنا. وكأنه كان يخاف علينا من ألم
لحظة الرحيل. في الواقع كان هو الذي يقوم برعايتنا لأن نحن الذين
نقوم برعايته.

قلبي يعتصره الألم، وروحي ترزح تحت العذاب. هناك يحيا
أوسكار ولا أستطيع نسيانه. لعلي أستطيع مقاومة الدموع حتى
المساء، فلا أريد أن أقارن فجيعتي بفجيعته والديه، وأن أقارن
ألمي بكارثتهم.

أشكرك لمقابلتي بأوسكار. بفضلته أصبحت خفيفة الظل،
واخترعت قصصاً وحكايات لم تحدث بل وأضحيت خبيرة
بالمصارعة. لقد ساعدني أوسكار في أن أوّمن بك. إنني أمثلئ

حبًا، حب يكاد يحرقني، لقد أعطاني أوسكار الكثير ممّا سيظل
لأعوام كثيرة آتية.

إلي اللقاء قريباً،

ماما الوردية

ملحوظة: في الأيام الثلاثة الأخيرة قام أوسكار بتعليق لافتة
فوق مكتبه. أعتقد ان كلماتها تخصّك.

ما فيش غير ربّنا بس اللي له الحق يصحيني

النهاية

2002

الترجمة من الفرنسية إلى الروسية: إيرينا جريجوريفنا مياخوفا

Irina Grigorievna Myagkova

117463 Moscow

Paustovskogo st. 8-3-470

095 422 10 09

imiagkova@mail.ru

حقوق الطبع في فرنسا مملوكة لوكالة

“Drama” Suzanne Sarquier

24, rue Feydeau 75002 PARIS, France

Tel.: 1-40-26-70-07

Fax; 1-45-08-42 07

Elisabeth Semon: منسق شئون أوروبا الشرقية:

e-mail: e.semon@dramaparis.com

الترجمة من الروسية إلي العامية المصرية: محمد صالح

mohammedlovespiano@yahoo.com